

**PORI MA ROMÚ KEKÁ
UVAMAN AMEIN BOMPON
MINO
(Romu)**

**Romui Vompon Ma Uvanteí
Pákenai Afova Vaya Ino**

*Ma vompon ma uvantein banta ino.
Bayá varen orin banta Pori ino.*

Uvarein orana ino.
AD fifti-seveni (57) fin nafi áa fifti-eiti (58) fin nafin uvanten mino. Mai maen Pori ma kanú manaú dádasí en ma monó doraríen eúkiyáren ma mo kípiyán mi ma vompon uvanten mino.

Ma vompon ma uvantein baru ino.
Koriní barurá ino. Mai maen kanú manaú biyontá ma Kiriki varafin ma Pori nóein pimpá ino.

Ma vompon ma uvaman amikhein kéká ino.
Yisasintá monó tiyáken ma mumunan in avúavá ano Romú barafin pefá o vákan mai kayo esé araíen o onano van Pori inikhen mai van mi mai kéká uvaman amikhen mino.

Nái ana vará ma vompon uvanten nafino.
Mai vompon mano setisi ume avúavá ma ena ena vain mi sian aní ukhen mino. Tiyarafenu ano vanasi aya urantin ume ída vain kéká ino sino van mi anunu iyáken be Anin ma

e fúaren e mantakheini narefó umei karavusi fintena miyaní uren mi Kantá Aunani ákonafó banasi maman kantasí ukhen mino. Monó dorarí in má inká ma varará ma aronaí in avúavá bá deren kákání ukhan mai van mi sikhen mino.

Mai vompompin ma kákán ineine ma sian amá ukhein baya ino.

Mumunantá ma miyaní uren aviran baya: Yisas-intá ma mumunan é tiferuna anon umei karavusi fintena setin miyaní uren mi fura sen ume vá aau vá ída van nanin banta e sen aní ukhen mino. Karaisi ma furen bei nare vanaein manon tetin tesé uran mi Tiyarafenu ano setin nan puntákein nanin banta e sen tariyain Tiyarafenu ano ma vanasii avúavá daimin nain damú tetin tiya inten mino (Romu 5:9 fin ná onano).

Tesé uran ma avusese ukhein baya: Mana yaná ano ída o yampakhan pura sen avusese uaren maman kantasí ukhen ne sen mai vompon mano sian amá ukhen mino.

Pori Ma Araí En Banasi Ákona Uantein Baya Ino

¹*Téi Pori Yisas Karaisini yoran banta uno. Tiyarafenu ano vei kama vaya varen banasi mo siamino van tivíden tisinten mino. ²*Mai kama vaya Tiyarafenu ano vei sakhanampa vanta kayo oorá tiádan kantá bompon dókifin uvamádan baren mino. ³Tiyarafenu Anin Yisasi ma varará banta an daven Kin Devitini anampin afoká ukharé eini kama vaya ino. ⁴Tetinti Bafan

* **1:1:** Apo 9:15 * **1:2:** Rom 16:25-26

Yisas Karaisin ma masí pintena Tiyarafenu ano ma vei ákonará avían mantaran maen mai véi Tiyarafenu Anin mi varéin Kantá Aunan mano setin anién mino.

⁵ *Tiyarafenu ano setin nan beni vaya varen ena anan nanin banta ma minó akhempá ma vaimpin mo siamintin bentá mumunan uren ben ánaín bákuriyáken ben aví maman daní ino van mi Yisas Karaisin pinté uaren mai amusin má ákona vá tetin timikhen mino. ⁶ Máan tukhan mi mai ma Yisas Karaisini kékasí ino van ma arakhein nanin bantafin tiretin má baono.

⁷ *Romu kéka soe, Tiyarafenu ano siretin avábá uren mi veni kékasí ono van aren mino. Tetin Tifóe Tiyarafenu vá Bafan Yisas Karaisin má ano vá tiretin tarisari uantanti vá kuse vano.

Romú Ma Monó Nanin Banta Vain Ma Pori Onano Van Iniyaré Ein Baya Ino

⁸ Ma varará minó akhempá ma vain nanin banta ano ma sireníj ákona mumunan nan ma siren iniyain nan mi Yisas Karaisin avíká araié Tiyarafenu susu sianté uno. ⁹⁻¹⁰ *Mai ma séi moéké tukáké mumunan iyaruna Tiyarafenu Anini kama vaya ma vanasi siamiyaruna mai sireti ma o afasí iyaona yana san nái máa yádásá béin timúkimpó ena ena siamiya rafu mai véi afová ukhen mino. Mai Tiyarafenu ano kanaíen aaí intí tiretin o onano van mi ena ena simúkiyá uno.

¹¹ Mai fara vara seyo, siretin ma ayain monó avúavá ma ákona uantan mai siretin má daídékuya Bafampin ákona e vano van mi iyá uno.

* **1:5:** Apo 26:16-18; Kar 2:7-9 * **1:7:** Nam 6:25-26 * **1:9-10:**
Apo 19:21; Rom 15:23

12 Mai senti ineine máan mi ukhen mino. Tiretí ankani mumunan mano sen tiya intin maen inká anona senti mumunan mano siretin aya intin ma inten mai avúavá anon minó tetinti mumunan ákona usintanten mino. **13** *Mumunan tiyofi sifá tiváeyan noe, sireti vaípá téi orono van kokhon damú ineine iyaré umpo saréa sretí ankan afovasá ono. Tenti yorantá ma ena anan kéká ano mumunan nanin bantaí uan unein máa mana siretin má ono van mi séi iyákun mifo kokhon daná ano ena ena afoká iyan tenti aa iyariyaren mino.

14 Para vara seyo, Kiriki kéká maen afova vain nanin bantan bákán inká ena kéká maen ída afova vain nanin banta vákan mi máí kampin dorano van mi Tiyarafenu ano séin ma yoran timikhen mino. **15** Máan tukhái sireti Romú nanin banta ma kama vaya siamin nan ten tirá ano mantiyaren mino.

16 *Máan tukhái kama vaya ma siami nan téi ída siyave éiyá uno. Mai fara vara seyo, Tiyarafenui ákona mai kama vayafin báken mumunan ma ein nanin banta evaránen aviriyen mino. Tetí Yutan kéká nare ma siviören ena kéká bá deren aviranten mino. **17** *Tiyarafenu ano mai kama vaya rákéi vei avúavá aní uren mi setin nan puntákein nanin banta e sen taré iyan mino. Tetí ankan pura sé mumunan iyákun ná tetin nará puntákein nanin banta e sino. Mumunan aa sáké anan Tiyarafenu avorá puntákein nanin bantaí inono. Mai fara vara seyo, Tiyarafenui vompon

* **1:13:** Apo 19:21 * **1:16:** Mak 8:38; Apo 13:46; 1Ko 1:18-24

* **1:17:** Rom 3:21-22

dókifin máa sikhen mino. “Mumunan ma inain nanin banta van mi Tiyarafenu ano funtákein nanin banta e sen ararantin ída furin ayun para van aunan baranten mino.” **Aba 2:4**

*Ume Avúava San Ma Tiyarafenu Ano Aran Nan
Uantein Baya Ino*

18 Máan tukhan maen mai ma namu avúava san mana uren pura sikhein avúavá ma oyan amé iyain kékápin Tiyarafenu ano inaru fáké bei aran daná anié iyan mino. **19** *Para vara seyo, Tiyarafenu ano mai nanin banta vei avúavá aní íkan afová uran betíi inimpin pe van mino. **20** *Mai ma vain danasinta maen Tiyarafenu ano ma esé araíen inaru vá bara vá uváden inká minó danasinta ma uvantein táké ma erikhein mai vanasi ano véin ída ontén mifo veni aúpá ma vain ákona vá béis ma uvantein danasinta vá anan afová en ontén mino. Máan tukhantin mi ída mana nanin banta ano kanaíen Tiyarafenu van ída afová ukhé uno sen tinten mino.

21 *Betí ankan Tiyarafenu afová ukhen mifo vetí ída ven aví daní iyan ben tusu sian tiyan é iyan mino. Máan tiyákan mi vetíi ineine ano asuse uvíkan ineine vá afova vá ma ída vain kéká an dakhan mai anon aúpin titípa ukhan aminofin ban mino. **22** *Báken tetimpin afova van mino sé iyan mifo vetíi ineine asuse ukhein kayo ino.

23 *Máan tukhen mi aunan má kakhan má ma vain Tiyarafenun betí ankan oyan amiren ída ena vá bentá monó té iyan mino. Betí ankan banta

* **1:19:** Apo 14:15-17; 17:24-28 * **1:20:** Yop 12:7-9; Íbo 19:1

* **1:21:** Efe 4:17-18 * **1:22:** Yer 10:14; 1Ko 1:20 * **1:23:** Diu

4:15-19; Íbo 106:20

aman manon nafi nun aman manon nafi safúna
 aman manon nafi inká osafáe aman manon nafi
 uvariyan uren Tiyarafenurá ma monó teren me
 ifá en mai yanasantará anan monó té iyan mino.

*Barará Ma Vain Nanin Banta Ano Ma Ara Ara
 Umeí É Iyain Baya Ino*

²⁴ Máan tiyákán Tiyarafenu ano vetin ampiádan mi uméin anunu ano vetin e yarifaádan ída funtákein avúavasí iyáken beraran namu avúava suron baré iyan mino. ²⁵ Máan nanin banta ano Tiyarafenui fura sikhein baya ampiren kampun bayan bariyan mino. Máan tiyáken minó daná ma uvantein Tiyarafenu me oyan amiyáken béis ma uvantein danasintará monó tiyan mai yanasantá aránaópá oriyan mifo seti vá Tiyarafenu avisá ena ena yaní ó tifano. Pura ino.

²⁶ Betí ankan Tiyarafenu me oyan amin mi mai Tiyarafenu ano vetin ampiádan mi vetíi fain avúavápin ban mino. Bákán mi anasi kéká ano ábasui funtákein avúavá me ampiren beraran ída funtákein namu avúavá ánaín bákuré iyan mino.

²⁷ *Banta kayo vá deren ábasui funtákein avúavá bá me ampiren betin aúpin ira ariyákan e manten ena vanta kéká bá namu avúavasí é iyan mino. Banta kéká ano ma ayave avúavá ma variyain mai ayái anona evaránen betíi namu miyan baré iyan mino.

²⁸ Betí ankan ída Tiyarafenu aránaó ban in-eine íkán mi vetin áikán namu ineine ánaín bákuriyáken minó ída funtákein avúava sintá varé iyan mino. ²⁹ Ara ara namu avúava sintá ma

* ^{1:27:} Riv 18:22; 20:13; 1Ko 6:9

veti varé iyain mai ída funtákein avúavá bá ena ina yaná ódare namu ineine uantan má ena namuroí uantan avúavá bá ena ina yana san aran iyáken inká banta aruan puriyáken aruve asive iyan ena vanta kampun tian tiyan ena vanta namu uanté iyan mino. Máan tiyáken inká ena oyampá baya siyan maen ³⁰ oorá ará baya e sian more mere iyáken Tiyarafenu namuroí uantiyan baya átakharé uren au khákán iyáken beyan nan amo siren namu avúava sintia varano van mana iniyáken be anóe afóeni vaya átakharé iyan mino. ³¹ Betí ankampin ída ovaren me iníden baran avúavá bákán betí ma siádákaré ein baya ánaín ída yakhafiyan mino. Máan tiyáken betíi ádékena van ída iniyán ena vanta van ída arunan uantiyan mino. Mai namu avúava sintia ano vetimpin bíkakhen ban mino. ³² Tiyarafenui man baya ano máan avúava sintia ma varan nain mano vá purino sikhan maen betí ankan afová ukhen mifo mai vaya átakharé iyáken ara ara namu avúavá betí bariyan ena kéka san moéke mai avúavasá barano siyákán bariyan mino.

2

Tiyarafenu Ano Ma Ume Yaimiyain Baya Ino

- ¹ *Máan tukhanti éi ída setisi kéka san mai namu avúavá bariyan mino sinono. Para vara seyo, ei avúavá ano ída funtákan mae mai ena ano ma variyain avúavá máan éi má bariya ono.
- ² Máan tukhan mae setí ankan afováé tifékun mai Tiyarafenu anon puntákein avúavápói mai ma

* **2:1:** Mat 7:1-2; Yon 8:7

namu avúavá bariyá ein kéká daiminten mino.
³ Máan tukhanti éi ma iniyaona ena kéká anan Tiyarafenu ano yaíden uman amirantí maé mai uman ída varanté unó té iniya fono. ⁴*Tiyarafenu ano ma éin ída ainen namu miyan amin ma kama avúavasien ayáká ma ave ukhen bain mai van éi ídá iniyáké oman aniana iya fono. Éi mai avúavá pinté ará baerano van mi vei kama avúavá anien ída ainen uman amiyan mino.

⁵ Máan tiya ompo éi e ará ákona ureya ída ará baere ono. Máan ma iya vaona avúavá anoi ei namu miyan átaru iya vaonai Tiyarafenui funtákein kó ma erin nain damúi veni aranan ná ano yákó intiya éi mai namu miyan baran nono.

⁶ *“Mana mana nanin banta ano ma variyain avúavákai Tiyarafenu ano yaiminten mino.” *Íbo 62:12; Pro 24:12*

⁷ Máan tinten mifo inte kéká anó mantaan ákona ukhen kama yorarí iyaré inten nafi mai Tiyarafenu ano íngimpáké betin amo siren kákan bí bá ayun ma fara van oriyan ban aunan ma aminten mino. ⁸*Aminten mifo mai ma vetiyan ban nain nan mana ma inirena pura vaya me oyan amiren ída funtákein avúavá ánaín mana vákuriyá inain kékái mai Tiyarafenu ano ve aran nan ná betin amaniná bana inten mino. ⁹ Mai ma namu avúavá ma variyain kayofin mi aau vá uman má afoká inten mino. Mai uman mano Yutan kayofin nare afoká uaren ena anan nanin bantafin orera inten mino. ¹⁰ Máan tinten mifo kama avúavá ma variyaráin nain nanin bantan Tiyarafenu ano

* **2:4:** Efe 1:7; 2Pi 3:15 * **2:6:** Mat 16:27; 2Ko 5:10 * **2:8:**
2Te 1:8

inarurá kama kumanin má kákán bí bá ará kusin má aminten mino. Yutan kayofin nare amiaren ena anan nanin banta vá deren aminten mino. ¹¹ Para vara seyo, ída aronaín avúavá bantin Tiyarafenu ano mana avúaváká anan daiminten mino.

¹² Man baya ma ída afová ukhen ma umeí iyaréin nain kékái Tiyarafenu ano yaíden uman aminten mino. Man baya ma afová ukhen ma umeí iyáin kékái Tiyarafenu ano mai man bayafó betíi avúavá daíden uman aminten mino. ¹³ Para vara seyo, man baya van mino sen ma fara oniyain kéka sa Tiyarafenu avorá puntáken naino. Ída ino. Mai ma man baya ánaín bákuriyain kéka san mi Tiyarafenu ano funtákein kéka se siyan mino. ¹⁴ *Ena anampin ída Tiyarafenui man baya váé iyan mifo vetíi inin pintéi fura sen ma man baya afová ukhen dakhafeiníi iyan mino. Para vara seyo, vetíi aukákéi funtákein avúavá ánaín dakhafiyan namu avúavá oyan amiyan mino. ¹⁵ Mai ma variyain avúavá anon betin aníen Tiyarafenui man baya ano setin túpin bái funtákein avúavá bariyáké namu avúavá ída variyá uno sen inikhen mino. ¹⁶ Inikhen mifo vanasi ma yaimin nain damú ma fura sen afoká intin maen Tiyarafenu ano Yisas Karaisin ákona amintin minó nanin banta ma aúpá bariyáin nain avúavá daiminten mino. Máan mi sé tesi vaya minópin tian amá uno.

*Man Baya Anon Kanaíen Tiya Inten Ne Ma
Yutan Kayo Ano Siyan Baya Ino*

* ^{2:14:} Apo 10:35

¹⁷ Téi Yutan bantan báké Tiyarafenu man baya fákakhé maé beni kékái varuna véi siya inten mino sireya e amo sé iya ono. ¹⁸ Tiyarafenu ma anunu iyain éi afová ukha ono. Para vara seyo, man baya fintena kama avúavá bá namu avúavá bá inka éi inireya afová ukha ono. ¹⁹ Éi seja inka séi afová ukheruna kanaié auu yufúkukhein aa aní uanté inká anukheimpin ma vain kéká oon kakhaanté onté uno se iné iya ono. ²⁰ *Éi ma ininyaona ano Tiyarafenu man baya fintena fura vaya vá afova vá minó manteruna mai kasaé ída ma afova vain kayo vá inka iyampon arinta an ma yakhein kéká bá afova amiyá onté uno se iné iya ono.

²¹ *Máan téiya ompo ena nanin banta ma afova amiyáke mai eyan ída afova variya ono. Ena kéká san ída vá umoyan barano sire mae éi umoyan baré iya ono. ²² Ena ana safí avafun nafi ma yarifan mai namu ukhen ne sé iya ompo éi mai avúavá baré iya ono. Kampun ayarafenurá ída vá monó teno séiya ompo monó ma ída inin afokhampin ma vain nanin bantai monó namun pintena éi manáa yaná umoyan baré iya ono. ²³ Éi ma ininyaona ano Tiyarafenu man baya afová ukhé uno sireya e amo sé iya ompo éi Tiyarafenu me oyan amireyá beni man baya yurafuré iya ono. ²⁴ Mai avúavá san mi Tiyarafenu vompon dóki ano máa sikhen mino. “Tiretí ankani anarái ena anan kéká ano Tiyarafenu oyampá baya siren béin oyan amé iyan mino.” *Ais 52:5; Isi 36:22*

* **2:20:** 2Ti 3:5 * **2:21:** Mat 23:3-4

Au Khavin Avúavá Pákena Vaya Ino

²⁵ Tiyarafenu man bayá ánaín ma vákurinteya mai au ma khavin avúavá kama inten mifo ída ma minó man bayá ánaín bákurinteya mai éi ída ma au khakhein banta an mi yakha ono.

²⁶ *Máan tukha ompo ena anan nanin banta kayo ano ma Tiyarafenu man bayá ánaín ma yakhafintin maen mai ída Tiyarafenu ano vetin avían bei kékasí inten nafino. ²⁷ Ena anan nanin banta ano ída au khavin Tiyarafenu man bayá ánaín dakhafiyan mifo sireti Yutan kéká ano veni man bayá afová ureya au khaviya ompo man bayá ánaín ída yakhafiyaona enan anan kéká ano ínaiimpáké tiretin daídantin uman aminten mino.

²⁸ Mai fara vara seyo, éi ída kanaíe yan bukhafa máara safi inká au khavin avúaváka safi Yutan banta uroní inono. ²⁹*Ida ino. Tiyarafenu avorá ma funtákein manoi fura sen Yutan banta uron ban mino. Inká pura sen au khavin avúavá ma vain mai yan bukhafa máa ma au khavin naino. Tiyarafenu Kantá Aunan manoi aúpin afoká uadé iyan mino. Intéa kéká anó mai avúavá baré iyan nafi mai varará nanin banta ano va amusin uanté iyan naino. Ída ino. Tiyarafenu anon amusin uanté iyan mino.

3

Tiyarafenu Ano Ma Siren Mai Ánain Pura Sen Dakhafiyan Baya Ino

¹ Au ma khavin avúavá ma au ina yaná ana ma vantin maen Yutan kéká ano intesá ená ena anan

* **2:26:** Kar 5:6 * **2:29:** Diu 30:6; Kor 2:11

banta kéká esantanten nafino. Au khavin avúavá ano kama yanasá afoká uádé iyan nafino. ² Pura uron mino. Tiyarafenu ano Yutan kayo ara ara kama yanasinta amikhen mino. Esé araíen minó bei vara amikharen mino. ³ Pura ino, manáa ano vetí ma siadákaré ein baya yurafuren mai ánaín ída yakhafé iyan mifo máan ma inain nan Tiyarafenu ano veyan ma siadákaré ein baya yurafurinten nafino. ⁴ Ída uron mino. Minó barará banta ano kampun té iyan mifo Tiyarafenui vompson dóki ano ma sikheinien Tiyarafenu veyáká anan pura sé iyan mino.

“Tiyarafenu oe, éi funtákein avúavá máa fosá téin kó tisintano.

Beti ma éin kó tiantano van inti maeya éi vetúi kó darádeya funtákein kó anan tin nono.”

Íbo 51:4

⁵ Tetisi namu avúavá ano ma Tiyarafenui funtákein avúavá ma maman dákosí urantí maé mai seti inte esá tente rafuno. Tiyarafenu ano ma setinti ume ayá ma anona simin nain nan mai véi namu avúavái iyan minó tétifante rafuno. (Manáa nanin banta ano máan ineinen é iyan mino.) ⁶ Ída uron mino. Tiyarafenu ano ma ída kama avúavá ángan ma ena ena vákurinten maen intesá uren ná béis minó barará nanin bantai avúavá daiminten nafino. ⁷ Manáa ano máa sen iné iyan mino: “Tenti kampun baya ano ma Tiyarafenui fura vaya ma maman dákó intin mai ano veni kákán bí moékqntin ma kákán suron iyantin maen mai véi nái anarasá téin nan ume vanta ino siren ná namu miyan tim-inten nafino.” ⁸ Erí namu avúavá bariyá tifékun

mai ráké moéken kama avúavá afoká ino ma siyanteya mai asuse vayan té iya ono. Manáa vanta ano sen tufin kuráden téi ma siyaruna vaya van asuse vaya vá manaí ukhein bayan tiyan mino sé iyan mino. Mai ineine máden ma mai avúavá ánaín dakhafiyá inain kékái Tiyarafenu ano yaíden mai ayá namu miyan aminten mino.

*Ma Varará Ma Mana Ída Funtákein Nanin
Banta Vain Baya Ino*

⁹*Máan tiya ompo mai seti Yutan kéká anó ena anan kayo esantakhé tife rafuno. Ída ino! Minó Yutan kéká bá Kiriki kéká bá ano manaí é umefin bá tiféuno. ¹⁰ Mai van Tiyarafenu vompon dóki ano máa sikhen mino.

“Ída mana vanta ano funtákein avúavá baré iyan mino.

Ída uron mino. ¹¹ Ída mana ano kama afova mantén mino.

Ída mana ano Tiyarafenu van dosikhen mino.

¹² Minó ano inka Tiyarafenu oyan amen mino.

Minó ano mo namu uron en mino.

Ída mana ano kama avúavá bariyan mino.

Ída uron mino.” *Íbo 14:1-3; 53:1-3; Ekr 7:20*

¹³ “Betíi vaya ano vanta masí ma yuvakhen namu aunka é iyainíi ukhen mino.

Betí ankan kampun baya anan té iyan mino.

Íbo 5:9

Betin oofen namu osafáei aufon ma yíkakhen avanen eraveiníi iyan mino. *Íbo 140:3*

* **3:9:** Rom 1:18; 2:24; 3:23

- 14** Betí ankan ena vanta ma namu uren aran amiyan uman amin baya anan té iyan mino.” *Íbo 10:7*
- 15** Beti ainan ena vanta aruan purono van manan é iyan mino.
- 16** Betí ankan ma oriyaintá ena nanin banta namu uanten uman amen en nó é iyan mino.
- 17** Ena nanin banta vá ma ará manafiní uren ban avúavá betí ankan ída afová ukhen mino.” *Ais 59:7-8*
- 18** “Tiyarafenu ano ma vetí ankan uman amin nan ída feré iyan mino.” *Íbo 36:1*
- 19** Máon tukhein nan mi man baya ma amikhein nanin banta ano mai man baya ano ma sikhan nain aránaopa sá bano. Para vara seyo, ínaiimpáké ma Tiyarafenu ano ma varará nanin banta ma yaimin nain damú ída mana ano kanaíen tiyáken téi man baya ída afová ukharé uno sinten mino.
- 20** *Man baya ánaín ma vákurin avúavá ano Tiyarafenu avorá ída funtáken banten mino. Para vara seyo, man baya ma afova suron ma inten mai seti ume nanin bantan bá uno sen afová inten mino.

*Yisas Karaisintá Ma Mumunan Iyain Kayon
Tiyarafenu Ano Ume Arúantáden Puntákein Nanin
Banta E Sen Aré Iyan Mino*

21 Man baya ánaín ma yakhfintasa Tiyarafenu ano setin nan puntákein nanin banta e sinten naino. Ída ino. Pefá ma Tiyarafenui vompon dókifin ma sikaré einiéen ena aa sákéi setin nan

* **3:20:** Íbo 143:2; Rom 7:7; Kar 2:16

puntákein nanin banta e sinten mino. ²² *Ume arútintano van muno siren ma Yisas Karaisintá ma mumunan inain nanin bantan Tiyarafenu ano ume arúantáden puntákein nanin banta e sinten mino. Yutan nanin banta fi ena anan nanin banta fi mai aa sáké anan Tiyarafenu ano minó aviranten mino.

²³ Mai fara vara seyo, minó nanin banta ano umeí ukhéi Tiyarafenui kakhakhein avúavápin o afasí ukhé tiféuno. ²⁴ *Yisasi ma setin ume arútintákein mairái Tiyarafenu ano setin tarisari uren puntákein nanin bantae siyan mino. ²⁵ Tiyarafenu ano ma Yisasin tiantan erein mai véi furintín beni nare ma vanain nain mano minó bei vanasii ume arúantano van mino. Mai avúavá ma Tiyarafenu varein manon tetin nan puntákein nanin bantae siyan mino. Pefá Tiyarafenu ano funtákein avúavasíi en umeí ma ein nanin banta ída ainen uman amikharen mino. ²⁶ Máan mana en mi saréa ma ume nanin banta ano Yisasintá ma mumunan in maen Tiyarafenu ano funtákein nanin bantae siyan mino.

²⁷ Máan tukhen mifo mana vanta ano kanaísá en ná téi kama avúavá bariyákun Tiyarafenu ano amusin iyan mino siren ná be amo sinten nafino. Ída ino. Man baya ánaín ma vákuriyá tiferuna rasaino. Ída ino. Tetisi mumunantái funtákein nanin banta e sinten mino. ²⁸ Para vara seyo, mumunan ma iyá tiferuna anon Tiyarafenu avorá puntaké tifé umpo man baya ánaín ma vákuriin avúavá ano vaino. Ída ino.

²⁹ *Tiyarafenu maen mai Yutan kayoi

* **3:22:** Kar 2:16 * **3:24:** Rom 5:1 * **3:29:** Rom 10:12

Ayarfenu aná ban nafino. Béi ídá ena anan nanin bantai Ayarfenu van nafino. Ída ino. Béi ída Yutan kékái Ayarfenu ana van mifo ena anan nanin bantai Ayarfenu vái van mino.

³⁰ *Máan tukhan maen mai mana Tiyarfenu anan báken pura sen ma mumunan in aa sáké anan Yutan kéka safi inká ena anan nanin banta fi e avían puntákein kéka se sinten mino. ³¹ *Máa sinten mifo mai seti nan man baya me ifá uren mumunan in ain mana yakhafino vara fino. Ída uran mino. Pura sen mumunan in avúavá anoi man baya maman ákona iya ono.

4

Abaraamuni Mumunantá Ma Funtákein Banta E Sein Baya Ino

¹ Abaraamu maen tetin an dakhein bantan báken tetin tináu ifo véin nan ma Tiyarfenu ano funtákein banta e ma sikhá ein nan ma afová iyáké tetí ankan nái esá té tifante rafuno. ² Abaraamu ma kama yorarí iyá ein nan puntákein banta uno siren be amo sinten mifo Tiyarfenu avorá ída ino. ³ *Para vara seyo, Tiyarfenui vompon dóki ano setin tisimiyáken Abaraamu ma Tiyarfenumárumumunan ein nan mi véin nan puntákein banta e sikhen mino. *Esé 15:6*

⁴ Banasi ano yoriyá eintái miyan baré iyan mifo ída fara amusin ne siren miyan amé iyan mino. ⁵ Máan tukhan maen banasii mumunantái

* **3:30:** Diu 6:4; Kar 3:20 * **3:31:** Mat 5:17 * **4:3:** Kar 3:6

Tiyarafenu ano funtákein nanin banta e siyan mifo vetí yoranta saino.

6 Man bayá ma yakhafiyareona rasa Tiyarafenu ano funtákein banta e sikhen naifo amusin ná ono sen Kin Deviti mai avúavá san mi sikhen mino.

7 “Baya átakharé uren umeí iyá intin ma ume ampiantáden

daramantákan nain kéká ano vá amusin ino.

8 Tiyarafenu ano ume ampiantáden ma fura sen ma áuntan nain kéká ano vá amusin ino.”

Íbo 32:1-2

9 Tetí ankan ma iniyaruna ano Abaraamuni mumunan nan mi Tiyarafenu ano funtákein banta e sikhen mifo mai avábá ma vain mai Yutan kéká ina ana fi aa ena anan nanin banta vasa fino. **10** Máa sikhen mifo mai inté ma uran ná béis nan puntákein banta e sen nafino. Au ma kharan ná puntákein banta e sikharen nafi áa au ma ída khakhan ná puntákein banta e sikharen nafino. Au ma ída khakhan maen pefái Tiyarafenu ano véin nan puntákein banta e sikharen mino.

11 *Au khavin avúavá ída afoká ukhan inká Abaraamu yere ída au khakhan maen pefái Tiyarafenu ano veni mumunantá puntákein banta e siren béis avíkaréin mai avúavái aníen mi au ma khavin dákóen mino. Máan tukhein nan mi mai ma au ída khavin mumunan ukhein kékáí anafun Abaraamu van mino. Betí ankaní mumunantái Tiyarafenu avorá puntákein kékáí ukhen mino.

12 Abaraamu maifefá ída au khakhen mumunan ukharen mifo au ma khakhein kéká ano ma Abaraamun an den mumunan ma intin maen mai Abaraamu vetin anafu vá deren ban mino.

* **4:11:** Esé 17:10-11

Tiyarafenu Ano Ma Iyáantákein Mai Minó Mumunan Nanin Banta Anon Baranten Mino

13 *Pefá Tiyarafenu ano ma Abaraamu má be anavasin má ayampin minó bara amenté uno siren ma iyáantákarein mai véi ma man baya ánaín bákuriyá einta saino. Ída ino. Béi ma Tiyarafenui vayará ma mumunan eintái véin nan puntákein bantae siren iyáantákaren mino.

14 *Máan tukhan mi man baya ánaín ma vákurin kéká anan Tiyarafenu ma iyáantákáré ein daná baranten mino ma sinteya mai mumunan ánaín ma vákurin avúavá ano faen daná an dantin mi mai ma Tiyarafenu ano iyáontan nain daná ano yere fara savifá o afeyoranten mino. **15** *Mai fara vara seyo, man baya ánaín ma vákurono van ein kéká man baya anon uman amé iyan mifo man baya ma ída vantin maen man baya yurafurin avúavá ída vanten mino.

16 *Máan tukhan mi Tiyarafenu ano ma iyátintákáré ein mai yaná mumunan aa sáké anan para vará tifanté uno. Yutan kayoi avúavá ánaín ma ída yakhafin ma Abaraamu ma mumunan iyá ein an ma yátifanté mai Tiyarafenu ano ma Abaraamun iyáantákáré ein daná bará tifanté uno. Máan mana en mi Abaraamu mai minó mumunan ma inain nanin banta anafuíi inten mino. **17** Tiyarafenu ano ma véin tiamicharé ein mai vompon dókifin mág sikhen mino. “Téi anon éin maman kokhon nanin banta anafuní é uno.” *Esé 17:5*

* **4:13:** Esé 17:4-6; 22:17-18; Kar 3:29 * **4:14:** Kar 3:18

* **4:15:** Rom 3:20; 5:13 * **4:16:** Kar 3:7

Purin banta ma evaránen aunan amen ma ída varé ein daná ma vayafó tíkan afoká ein Tiyarafenurá ma mumunan ein nan mi Abaraamu maman barará nanin banta anafuní uanten mino. ¹⁸ Tiyarafenu ano máa sikharen mino, “Éi kanaié minó ofu yankafinte fono. Ída ifo en ana akhafana ano máan uron mi en mo kokhoní inten mino.”

Esé 15:5

Mai ma iyáantein danasinta ano ída kanaíen afoká irí ukhan mifo Tiyarafenui vayará ana Abaraamu fura sen mumunan ukharen mino. ¹⁹* Abaraamuni orana mana antareti (100) vákan ben au varimú ukhan Sara ída kanaíen iyampon kairí ukhan maen béis afóvá ukhen mifo véri mununan mano ída ánuní in moéken ákona ukharen mino.

²⁰ Tiyarafenu ano ma Abaraamu minó daná iyáantákein nan iniren béis ída kokhon ineine ina vei mumunan ákona uren Tiyarafenu aví daní iyaren mino. ²¹ Para vaino, Tiyarafenu ano ma iyáantákein daná kanaíen afoká inten mino siren béis afóvá ukhen pasen mino. ²² Béini mumunan nan mi Tiyarafenu ano funtákein banta e sen mino.”

Esé 15:6

²³ Tiyarafenui vompon dókifin ma funtákein banta e sen ma arakhein mai Abaraamun beyákasara sikhen naifo ²⁴ mai setin ma san deren tikhen mino. Tetisi Bafan Yisasin ma Tiyarafenu ano masí pintena avian mantakheintá ma seti mumunan ma iyaruna mai van mi Tiyarafenu ano iniren teti nan puntákein nanin banta e sen tariyan mino. ²⁵*Tetisi ume arútintano vare siren Tiyarafenu ano namuro

* **4:19:** Esé 17:17 * **4:25:** Ais 53:4-5

kéká ayampin Yisasin ampiádan aruan puren mino. Púbíkan tetin nan puntákein nanin banta e sen tarano van mi Tiyarafenu ano véin masí pintena orun avían manten mino.

5

Mumuman Mano Ma Amusin Afokáin Nain Bayá Ino

¹ Máan tukhái setí ankan inka mumunan ukhé tifé kun mi Tiyarafenu ano seti nan puntákein nanin banta e sikhen mino. Tetisi Bafan Yisas Karaisi ma varein avúavá anon Tiyarafenu vá maman teti sirá manafiní usinten mino. ² Yisasi anon tetisi mumunantá aa uvítintadái Tiyarafenui sarisari aúpin bá tifé uno. Tiyarafenui ákona vá kakhan má dere varano van mi mantaan ákona ukhé tifé uno.

³ *Máan ma ukhé kun ma minó uman tetimpin afoká iyain mai vasará timusin ó tifano. Mai fara vara seyo, mai anon tetisi mumunan ákona usinten oriyan banten mino. ⁴ Tetisi mumunan ma ákonaen bantin maen mai anon tetin ákona usintantí minó akhenóka yo ékaré Tiyarafenu ma sivirano van tikhein nan ave ó tifanté uno. ⁵ Tiyarafenu ano ma setin tivirano van tikhein mai ída fasavi ave ukhé bá tifanté uno. Mai fara vara seyo, Tiyarafenu ano setin nan anunu uren mi Kantá Aunan timikhan mai ano setin túpin bíkakhen mino.

⁶ Teti yantá ída kanaí é mantaan ákona irí é kun mi Tiyarafenu ano ma aní ukhá ein damú afokáin ume nanin banta evaránen avirano van mi Yisas Karaisi yorun puren mino. ⁷ Ída kanaén

* **5:3:** Yem 1:2-3; 1Pi 1:5-7

mana vanta ano kama vanta aya ono van beni varu varen purinten mifo kama avúavá suron ma variyain bantai varu varen kasaen purono van inten mino. ⁸*Teti ume avúavúpin para vá tifékun mi Tiyarafenu ano ve ákona arunanái aníen mi Yisas Karaisi furino van tiantan eren mino.

⁹*Karaisi ma furen bei nare vanaein manon tetin tesé uran mi Tiyarafenu ano setin nan puntákein nanin banta e sen tariyain béis ma vanasii avúavá daimin nain damúi setin tiya inten mino. ¹⁰Tetí ankan ma Tiyarafenu vá namuroí ukharé ékun ma Tiyarafenu Anin ma furein manon namuro avúavá kípa sintáden Ti- yarafenu vá maman tirá manafiní usinten mino. Máan tukhan béis evaránen e mantakhein mai ma fara van oriyán ban uman pintena fura siren tiya inten mino. ¹¹Mai ma Bafan Yisas Karaisi ano ma varein avúavá anon tetin maman Tiyarafenu vá ma sirá manafiní ukhein mai vará timusin ó tifano.

Adamun Pinté Purin Afoká Uvin Ma Karaisin Pinté Aunan Baran Afoká Úkhein Baya Ino

¹²*Adamu ano ma umeí ein mai anon purin dákó uran ma varará oreraen mino. Mai fara va ino, minó nanin banta ano umeí ukhan mino. ¹³*Man baya ída afoká ukhan ume nare ma varará baren mifo man baya ma ída afoká ukhan maen namu avúavá ma variyá ein kayoi ume Tiyarafenu ano ída yankafiyán mino. ¹⁴Adamun také ma araí uren eren Mosesintá ma e kanaí

* **5:8:** Yon 3:16; 1Yn 4:10 * **5:9:** Rom 1:18; 2:5; Efe 2:3-5

* **5:12:** Esé 3:6; Rom 6:23 * **5:13:** Rom 4:15

ukhá eintá purini ákona yafikhan minó ano furiyaren mino. Mai kéká ano ída Adamu ma mana ákona are varákeinén mifo vetí ankan paran puriyaren mino. Ínaimpáké Yisasi ma ena avúavá baran nain mi Adamu faran aní ukhan mino.

¹⁵ Máan tukhen mifo Adamuni ume vá Tiyarafenu sarisari vá ída manaí ukhen mino. Mai fara vara seyo, mana vantai umerái minó nanin banta ano furiyaréin mi Tiyarafenu sarisarii ákona anon Yisas Karaisin pinté uaren banasii ume arúden evaránen avíken mino. ¹⁶ Tiyarafenu sarisari ano Adamuni ume vá ída manaí ukhein mi setimpin afoká é iyan mino. Adamu ano umeí ureintái Tiyarafenu ano minó nanin banta van umeí ukha ono sikhá maé tetí ankan moéké ume avúavá bariyá tifékun maen Tiyarafenu ano mai van ída inin tetin tarisari uren puntákein nanin banta e sen taré iyan mino. ¹⁷ Adamu veyáká umeí ureintái furin mano minó nanin bantafin afoká ukharen mifo Tiyarafenu moékkakhein tarisarirá ma funtákein avúavá baran nain kéká anon Yisas Karaisin pinté uaren ume vá purin má esantanten mino.

¹⁸ *Máan tukhan mi mana vanta anon man bayá yurafúdein anarái Tiyarafenu ano seti minó nanin banta mai umerái kó tisintákoren mino. Máan manan en mi mana vanta ano funtákein avúavá uren tétil e sivian Tiyarafenu kékási uren mi véi ayun ma fara van aunan tetin timen mino. ¹⁹ *Para vara seyo, mana vanta ano ma vaya átakharé ureintái minó nanin banta ano veni avúavá baren umeín nanin bantáí ukharen

* **5:18:** 1Ko 15:22 * **5:19:** Ais 53:11

mino. Máan manan en mi mana vanta ano ma Tiyarafenu oo yaiyuká eintái kokhon nanin banta ano véin avorá puntákein nanin bantaí inten mino.

²⁰ Minó nanin banta ano vetíi ume afová ino van Tiyarafenu man bayá amirákan beti mai man bayá moéken durafuriyan mino. Durafuriyáken kokhon umeí ma iyan maen Tiyarafenu sarisari ano moéken kákání iyaren mino. ²¹*Máan tukhan mi ume avúavá ano vetíi yafisiní ukhen mi mai ume anon purin afoká uanten mino. Máan tukhen mifo setisi Bafan Yisas Karaisini yorantái Tiyarafenu sarisari ano yafisiní ukhan mi véi setin tarisari uren teti nan puntákein nanin banta e sen tarará ayun para van oriyan ban aunan manté tiféuno.

6

Umeí Ákona Ma Kípakhein Baya Ino

¹ Taréa inte esá teti sé tifante rafuno. Umeí aná teti é oriyá bá tifékun ná Tiyarafenu ano sarisari en oriyan banten nafino. ² Ída uron mino. Teti inka ume avúavá kíparé purein an dakhé umpo mai intesá uré evaráné ume avúavá baranté tife rafuno. ³*Tetí ankan ma Yisas Karaisin má ma manafin túpá uvé monó non baré inká manafin túpá uvé puré ma ukhá é tiferuna mai sireti áunte rafono. ⁴*Monó non ma feré tiferuna anoi Karaisini furin má teti súpá uvékun mi Tiyarafenu ano Karaisin má manafin masí ukhen mino. Be Afóe ano ma Karaisin masí

* **5:21:** Rom 6:23 * **6:3:** Kar 3:27 * **6:4:** Kor 2:12

pintena ma vei kákán ákonafó avían manteiní é tetí ankan auyen aunan mamaré bá tifanté uno.

*Yisas Karaisin Má Ma Mumunan Nanin Banta
Ano Orun Mantakhein Baya Ino*

⁵ Tetí ankan Karaisini furin má manafiní ukhé tiferuna véi ma e manteiní é tetin má dere e mantá tifanté uno. ⁶*Tetí ankan ma umei yoran bantaí ma ukharé é tiferuna mai inka Karaisin ma yaa unkamádantá aruan purein mano setin túpin ma yoriyaré ein umei ákona kípakhén mino. Máan tukái seti ída umei yoran bantan bá tiféuno. ⁷ Para vara seyo, setí ankan ma Karaisin má pureruna anoi umei ákona fintena ampiadá bá tiféuno.

⁸ Inká tetí ankan ma Karaisin má manafin puró tifanté béisni auyen aunan bará tifantéi afová ukhé tiféuno. ⁹ Para vara seyo, Karaisi inka masí pinté e mantakhein béisni ída enádá purintéi tetí ankan afová ukhé uno. Mai furini ákona ída vain ída kanaíen béisni maman bararasí inten mino. ¹⁰ Béisni ma manádá ana ma furein avúavá anón umei ákona kípááden mino. Máan turen mi véi Tiyarafenu aví daní ono van para vano mino.

¹¹*Máan manaeaya saretí ankan má dere umei ákona aránaópá ída va ompo Yisas Karaisin pinté uare vá Tiyarafenu aví daní ono vará para vano.

¹²*Tiretí ankan ída vá áesiná ume ano saretíi avúaváká dafisino. Mai fara vara seyo, ume ano e yarifaádantiya namu avúavá ánain bákurin nono.

¹³*Tiretí ankan ída vá mana vukhafa áesin ná umei yoran danasí ukhen ná ena nanin banta

* **6:6:** Kar 5:24 * **6:11:** 2Ko 5:15; Kar 2:19 * **6:12:** Esé 4:7

* **6:13:** Rom 12:1

namu uantiyan bano. Ída vá máan tiyáke vá Tiyarafenu ma auyen aunan amikhein nará tiretí ankan pura sire vá minó bukhafa véin ná ameno. Tiretí ankan e au áesin ná Tiyarafenui yoran danasí uven ná beni funtákein avúavá dorarí ino. ¹⁴*Tareá ume ano ída sretí ankantá dafíken mino. Mai fara vara seyo, sretí ankan taréa ída man bayai aránaópá ba ompo Tiyarafenui sarisari aránaópái va ono.

Puntákein Avúavúi Yoran Bantaí Ma In Baya Ino

¹⁵ Máan tukhái setí ankan ída man baya aránaópá taréa vátifé umpo mai intesá ótifante rafuno. Tiyarafenui sarisari aránaópá bá tifé umpo mai umeisá é oriyá bá tifante rafuno. Mai ída uron mino. ¹⁶*Tiretí ankan ma mana yana san ma moéke ininteya mai veni miyan ída van doran bantaí ma inona ídá afová ukhe fono. Tiretí ankan umei miyan ma ída van doran bantaí ukheyá purinte fo áa Tiyarafenui vaya ánain ná bákureyá puntákein nanin bantaí inte fono. ¹⁷ Tiretí ankan pefá umei yoran bantaí ukharé en nan ma Tiyarafenu ano sretin ma vei auyen afova vaya siamira ma yakhafiyaona vará Tiyarafenu susu siantano. ¹⁸ Tiretí ankan umei yoran bantaí ukharé en nan mai finté Tiyarafenu ano ovaránen avíden maman puntákein avúavái miyan ída varan doran bantaí uraya va ono.

¹⁹ Ayafa vanta kéká bá ída miyan baran doran banta kayo váká o siaré ma siamiyaruna mai sretí ankan kásae ineno van muno. Pefá tiretí ankan e au áenán pain avúavá bá baya

* **6:14:** 1Yn 3:6 * **6:16:** Yon 8:34; 2Pi 2:19

átakharéin avúavá bái miyan ída varan doran bantaí ukhareya ompo saréa sireti au áesin ná puntákein avúavái ída miyan baran doran bantaí uvinti vá Tiyarafenu avorá kantasí ukhe vano.

20 Pefá ume avúavái ída miyan baran doran bantaí ma ukhá eona yamú kayofín puntákein avúavasí ma inan tiretí ankan ída iniyare ono. **21** Mai avúavá ano intéa kama yanásintá manan afoká uáden nafino. Ída ifo mai ano e aú iyampon ma aruan purin manan maman afoká ukhayai sireti ankan ma fefá bariyá eona avúava san taréa ayave iya ono. **22** Ayave van iyare enan Tiyarafenu ano umei ákona fintena sirenin evaránen avíden bei ída miyan baran doran bantaí ura va ono. Máan ma eona anon puntákein avúava afoká intiya fara van oriyan ban aunan baran nono. **23** *Para vara seyo, umei miyan purin mana ifo setisi Bafan Yisas Karaisin pinté uaren Tiyarafenu ano vei amusin mi ayun ma fara van oriyan ban aunan tetin timikhen mino.

7

Taréa Seti Ída Man Baya Aránaópá Bá Tiféuno

1 Mumunan ukhe ma man baya afová ukheona kéka soe, mai ma ída furin para vain kéká ano vá man baya ánaín dakhafino ma sikhein mai sireti ídá afová ukhe fono. **2** Mana ábasui avúavákái siádanté uno. Anasi ano ma vanta mantantin ma ve avafu ída furin para vantin maen mai man baya ano ve avafu má damuádan ban mifo ve avafu ma furintin man baya ano ída enádá

* **6:23:** Rom 5:12, 15

bá be avafun má damuádanten mino. ³ Máan tukhen mifo vanta ma ída furin para vantin ma ve aná ano ena vanta e manten o varanten maen mai nanin mano famúku avúavasíi inten mino. Máan tinten mifo ve avafu ma fúbintin maen mai man baya ano ída véin damukhein ena vanta ma varanten mai ída famúku avúavasí inten mino.

⁴ *Máan tukhanti mumunan tifá tiváeyan noe, ma vá afová ono. Tiretí ankan man bayai ákona finté Yisas Karaisin má daa unkamádantá púken nan mi Mosesini man baya ano ída fákaáda va ompo mai ma furin pinté e mantakhein banta vái kase vaono. Máan tukhaona kasaе Tiyarafenu avorá kama yorarí iyáke kama aran imádan nono. ⁵ Tetí ankan ma feyante sinunu ánaín ma fara yakhafiyá bá tiferuna anon tetin túpin umeíin ineine édaviyan mino. Máan tiyain mano man baya mamádan umeíin inin erí ma umeí urékun mi furin afoká iyaren mino. ⁶ *Máan tiyaré ma setí ankan Yisas Karaisi má pureruna anon man bayai ákona fintena utútintádan ída mai ano setí ankan damukhen mino. Máan tukhantí ída setí ankan peyante man baya ano ma uvantein bompon ánaín dakhafó tifanté umpo Kantá Au-nani auyen avúavá kái fure sé Tiyarafenu ánaín dakhafó tifanté uno.

Tiyarafenui Man Baya Ano Ma Setisi Ume Ma-man Afoká Ein Baya Ino

⁷ Tiyarafenui man baya ma iniyaruna anó umeí iyá tife rafuno. Ídá ino. Man baya ano ída umeí iyan mifo setisi umen aní usinté iyan mino. Para

* **7:4:** Rom 6:2, 11 * **7:6:** Rom 8:2; 6:4

vara seyo, man baya ano ma sen “ída vá ena ina yana san aran nano.” *Eks 20:17; Diu 5:21*

Man baya ano ma ída sisimikhantí mai séi ída kanaí é afová onté uno. ⁸ Máan tonté erunaren mifo man baya finté uaren mi ara ara sinunu mamádon tetin túpin édavé iyan mino. Man baya ída varé intin umei ákona ída van nainten mino.

⁹ Téi man baya ma ída afová ukhé maé mai séi kana vá uno siyaré umpo man baya ma ineruna anon téi ume vantán baruna furonté uno sé afová é uno. ¹⁰ Man baya ano kamaen ayun ma fara van oriyan ban aunan ma simeren mifo furin miyan manan timen mino.

¹¹ *Man baya ano séin mákádá umeí uré kun mairái man baya ano umeí e ono siren purin miyan timen mino. ¹² *Máan ten mifo man baya ano veyan ádun ban puntáden kantasien kama ukhen mino. ¹³ Kama ukhen mifo mai kama avúavá anó téin tiruan ná puriyan nafino. Ída uron mino. Mai ume ano kama yaná pókéi séin purin miyan timen mino. Kama man baya anon téi ma variyaruna yanásinta van mai namu avúavái variyáke umeí iya ono siren aní iyan mino. Tiyarafenui man baya fókéi ume ano namu yanásinta afoká iyantí mai setí ankan umei namu yanásinta fura sé oná tifanté uno.

Tetimpin Ma Namu Avúavá Bá Kama Avúavá Bá Aruviyain Baya Ino

¹⁴ Man baya ano funtáká afová ukhé tifé umpo séimpin ma aau vain manon ten maman umei ída miyan baran doran bantaí uren ná bá uno.

* **7:11:** Esé 3:13 * **7:12:** 1Ti 1:8

15 *Téi ma variyaruna avúavá ída afová ukhé uno. Mai fara vara seyo, funtákein avúavá barano ma seruna ída varéiyá umpo ída ma sinunu ukhein avúavá sintan téi variyá uno. **16** Bariyá umpo séi ma variyaruna avúavá sinta van ma ída sinunu ékun maen mai anon man baya van kama yaná ino sen aní inten mino. **17** Aní inten mifo mai ída seyantá namu avúavá sinta variyá uno. Ída ino. Ume ma sen túpin bain manon namu ineine simí bariyá uno. **18** Dan bukhafai anunu ánaín bákuré moékantá namu avúavasí ékun mai ano sen túpin ída mana kama avúavá báká afová ukhé uno. Mai fara vara seyo, kama avúavá ana varano van iyá umpo ída kanaí é baré iyá uno. **19** Téi kama avúavá ma varano seruna mai ída varé iyá uno. Inká namu avúavá ma ída varano seruna mai séi varé iyá uno. **20** Baré iyá umpo séin ma ída sinunu ukhein avúavá ma varé iyaruna mai ída seyantá baré iyá uno sé iniyá umpo sen túpin ma vain ume anon baré iyan mino.

21 Máan tukhái séi onékun mai avúavá ano sentá dafíkái séi kama avúavá ma varano van ékun maen namu ineine ano senti aa iyariyan ban mino. **22** Máan tiyákái séi Tiyarafenui man baya van pura sé te sükáké tinunu ukhé uno. **23** *Máan tukhen mifo séi onékun umei ákona ano sen túpin báken mai ano senti ineine vá aruvé iyan mino. Mai umei ákona ma séin túpin para vain manoi maman bararasí uren miyan ma ída varan doran bantaí urá bá uno. **24** Mai ume anon téin maman kákán umampin kaen mifo iye anó mai fintena

* **7:15:** Kar 5:17 * **7:23:** Kar 5:17; 1Pi 2:11

séin tiya uren tiviranten nafino. ²⁵*Tetisi Bafan Yisas Karaisin pinté ma uaren tiyaein nan mi Tiyarafenun tusu sianté uno.

Máan tukhein nan mi sesi ineine finté Tiyarafenui yoran bantaí ono van inikhé umpo yan bukhafai anunurái umei miyan ída varan doran bantaí ukhé uno.

8

Kantá Aunan Táké Ma Aunan Bariyain Baya Ino

¹ Máan tukhái Yisas Karaisin má ma manafin túpá ukheruna nanin banta mai man bayá ano ída kanaíen kó tisintanten mino. ² Mai fara vara seyo, Yisas Karaisin pinté uaren mi aunan ma amé iyan mai Kantá Aunani ákona anon ume ú purin níi ákona finté setin útúfen mino. ³ Man bayá ano ume fintena ída kanaíen tetin tiya oren eimpin Tiyarafenu ano setin tiyaono van ena aa uvisen be Anin tiantan barará banta an daven eren mifo véri ída ume vain banta ino. Tiyarafenu ano mai aa sákéi setisi ume van be Anin tiantan daa unkamádántá e fúaren umei ákona ano ma setintá dafikáré ein mai aruan puren mino. ⁴*Man bayá ano mafefá tikharé ein mai setimpin mo kanaí ino van mi mai avúavá baren mino. Máan tukhái saréa setí ída ume avúavá ánaín dakhafiyá umpo Kantá Aunani avúavákái yakhafiyá tiféuno.

⁵ Bara ráke avúavá ánaín ma yakhafiyain kékái ineine ano vara ráke avúavá san mi iné iyan mifo Kantá Aunani avúavá ánaín ma yakhafé iyain kékái ineine ano Kantá Aunan mano ma anunu

* **7:25:** 1Ko 15:57 * **8:4:** Kar 5:16, 25

ukhein mai ánaín mi yakhafiyan mino. ⁶ Bara ráke avúavái anunu ánaín ma yakhafin nain kéká ano furinten mifo Kantá Aunani anunu ánaín ma yakhafin nain mai kéká ano ayun ma fara van aunan mamaren ará kusen banten mino. ⁷ Mai fara vara seyo, vara ráke avúavá san ma anunuin manon Tiyarafenu namuroí uantiyáken ída veni man baya ánaín dakhafé iyan mino. Máan tiyain ínaimpáké ída kanaén beni man baya ánaín dakhafinten mino. ⁸ Máan tukhantin mi vara ráke avúavái anunufin ma noin kéká ano Tiyarafenun ma amusin ukhein avúavá ída kanaén baranten mino.

⁹ *Baranten mifo saretí ankan ída enádá bá bara ráke avúavápin no ono. Ída ino. Tiyarafenui Aunan ma saretí ankampin ma vantin mae mai sreti saréa Kantá Aunani avúavápin mi no ono. No ompo Karaisini Aunan ma ída mantein kéká mai ída Karaisini kéká ifo afova sá ono. ¹⁰ *Ume avúavá ano sretin au aruan purinten mifo Karaisi ma fúaren e mantein manon Tiyarafenu avorá funtákein kékasi ukha ono. Máan tukhen nan Yisas Karaisi ma sretimpin bain manon tiretin aú iyampon ayun para van mino. ¹¹ Tiyarafenui Aunan mano Yisas Karaisin masí pintena avíon manten mino. Mai Aunan ma sretí ankampin ma vanti mai ma furin bukhafafin Aunani yorantá Tiyarafenu ano ayun ban aunan aminten mino.

*Kantá Aunani Ákonafó Ma Mumunan Iyain
Kayo Mai Tiyarafenu Akhafana Ino*

* **8:9:** 1Ko 3:16; 12:3 * **8:10:** Kar 2:20

12 Mumunan tiyofi tifá tiváeyan noe, setí ankan auyen avúaváká ana vá nó tifano. Teti feyante arái avúaváká nono vara siya rauno. Ída ino.
13 *Tiretí ankan ma feyante arái avúavápин ma nonteya mai furin nompo Kantá Aunani ákonará ma minó aui namu avúavá ma aruan purinteya mai siretí ankan ayun ban aunan baran nono.
14 Minó nanin banta ano ma áin ma Tiyarafenui Aunan mano ma aviren oriyain mai Tiyarafenu akhafanan ban mino. **15** * *Mai Aunan ma Tiyarafenu ano amikhein mano ída sretin maman para yoran bantaí urantiya sreti evaráne akhokho van inono. Ída ino. Tiyarafenui Aunan mano sretin maman Tiyarafenu akhafanaíi iyan mino. Kantá Aunani ákonarái seti máa sé Tiyarafenu van aréiyá tiféuno. “Tifóe oe, Tifóe oe.” **16** *Mai veni Kantá Aunan mano setinti sú iyampon tisimí tiféi seti Tiyarafenu akhái vá uno sé iyá tiféuno. **17** Teti Tiyarafenu akhafanan bákun mai ma véi simeno van tisintákein daná ma setin tifá tiváe Karaisin ma amikhein mai kama yaná baranté tiféuno. Béi ma uman barein máan té ma saréa seti uman mantaré ínaimpá teti kákan bí mamaré ben má kama kumanirí onté tiféuno.

Ínaimpá Ma Kákan Bí Baran Nain Baya Ino

18 Ínaimpá ma Tiyarafenu ano setin kákan bí timin nain mano saréa ma seti variyaruna uman má ída manaí inten mino. **19** Mai fara vara seyo, Tiyarafenu akhafanaí ma ukháin nain kéká ma

* **8:13:** Kar 6:8; Kor 3:5 * **8:15:** Mak 14:36; 2Ti 1:7 * **8:15:**
 Kar 4:5-7; Rev 21:7 * **8:16:** 2Ko 1:22

maman afoká inain damu san mi véi ma uvantein danasinta ano ave ukhen mino. ²⁰*Minó daná ma saréa ma váken ma namu ukhein mai yanasantia ída vei anunurá afoká ukhen mino. Ídaino. Tiyarafenu anon betin afoká uráken betin kama avúavá uantano van iyákan ave ukhen mino. ²¹Ave ukhen ma fúaren pútaono van ma iyaréin nain uman pintena ma utúantantin Tiyarafenu akhafana vá ma kákán bí baran nain mai van mi ave ukhen mino.

²²Para vara seyo, Tiyarafenu ano ma uvantein danasinta ano mai ma anasi ano iyampon kaono van inamun nan ma aureinién eriyan bá tetí ankan afová ukhé tiféuno. ²³*Ída mai yanasantia ano ana aí bariyan berai siyan mifo setí araí in amusin ma Kantá Aunan timikhein kayo ano yeren mai uman pintena útútintano van mi verai siyá tiféuno. Máan turen Tiyarafenu ano ma setin auyen bukhafa simiren inká maman be akhafanai suron ono van ma siádan bain damu san mi ave ukhé tiféuno. ²⁴Tiyarafenu ano setin evaránen tivídái véi ma kama avúavasí usintano van ma sikhein nan mi setí ankan mumunan ukhé béin ave iyá tiféuno. Mai fara vara seyo, gefá ma mantanuna yana san ída ave iyá bá tifanté uno. ²⁵Máan tó tifanté umpo mai ma ída mantanuna yanasantia ma varano sé tifanté mai setí ankan tirá kusin má bákesá ave ó tifano.

²⁶Máan ma ukhé tifékun mi Kantá Aunan mano setin uman pintena siya inten mino. Mai fara vara seyo, setí ankan ma simúkonuna yanasantia ma ída afová ukhékun maen mai Kantá

* **8:20:** Esé 3:17-19 * **8:23:** 2Ko 5:2-4

Aunan mano setin tiyaen berai siyan Tiyarafenu amúkuan aminten mino. ²⁷*Mai ma setin túpin afová ukhein Tiyarafenu anon Kantá Aunani inin afová ukhen mino. Mai fara vara seyo, Tiyarafenui ineine ánaín mi yakhafen Kantá Aunan manon tetí mumunan kéká ákonáen amúkusinté iyan mino. ²⁸*Tiyarafenu ano ven nan ma anunu ukhein kéká ayaino van mi minó danápin doriyái setí ankan afová ukhé tiféuno. Tiyarafenufin manáa ákoná ineine vain nan mi mai kéká arakhen mino. ²⁹*Para vara seyo, Tiyarafenu ano vei vanasií ma inain kéká ma maman be Anin an darantin ma mai nanin banta aváení ma ve Anin manó inain mai véi gefái afová ukharen mino. ³⁰Béi ma gefá aní ukharé ein kékai arakhen mino. Mai ma véi arakhein kéká san puntákein kéká ino sen araren mai kéká kákán bíi aminten mino.

*Mana Yaná Ano Ma Ída Kanaí En Tiyarafenui
Avábá Pinte Yo Siviran Nain Baya Ino*

³¹*Tiyarafenu ano ma kama avúavasí ukhein nan mai inte esá teti sé tifante rafuno. Tiyarafenu ano ma setin tiya ukhantin maen mai iye anó kanaíen tetin namuroí usintanten nafino. ³²Tiyarafenu ano ída ve Anin pákan tetin tiyaino van héin tiantan eren mino. Be Anin ma setin timikhanten maen mai ídá ena yanásinta vá dere fara siminten nafino.

³³*Tiyarafenu ano ma setin maman bei nái ma urantí bá tifékun maen mai iye anó tetin kó tisintanten nafino. Ída ino. Tiyarafenu ano

* **8:27:** Íbo 139:1 * **8:28:** Efe 1:11 * **8:29:** Kor 1:18; Ibu 1:6

* **8:31:** Íbo 118:6 * **8:33:** Ais 50:8-9

veyantái setin nan puntákein nanin banta e sen tarakhen mino. ³⁴ Iye anó teti nan ume ayá namu miyan barano sinten nafino. Ída ino. Yisas Karaisi fúaren e mantavin Tiyarafenu ano véin kákán bí amiran ben ayan kurompá báken tetin tiyaino van Tiyarafenu siamiyan mino.

³⁵ Karaisini avábá pinte nái yaná anó tetin do siviranten nafino. Aau anó tetimpin afoká inten nafi uman nafi vanta kayo anó tetin namu usintanten nafi sirafan nará ótifante rafu ída ma suí daná ban nain mano fi áa namu yaná anó tetin namu inten nafi áa furin nan ma akhokho van in mano fi mai minó máa yanasinta ano kaná Karaisini avábá pintena yo siviranten nafino. ³⁶ Mai yanasinta ma setimpin ma afoká é iyain mai Tiyarafenui vompon dóki ano máa sikhan mino.

“Tetí ankan eni vanasin bákun ena ena yamú tetin tiruan puriyan mino.

Sipisipi an den tetin timen tíkano van manan iyan mino.” *Íbo 44:22*

³⁷ Máan tukhé tifé umpo mai yanasinta afoká inten mifo mai ma Karaisi ano setin nan avábá iyain mai véi anon tiyaintí mai yanasinta esantanté uno. ³⁸ Ída mana yaná ano kaníen beni avábá pintena setin do siviranten mino. Purin má ayun ma fara van mano fi áa enisori kayo vá namu aunan má ano fi áa saréa ma afoká ukhein danasinta vá ínaimpá ma afoká inain danasinta vá ano fi áa minó ákona vain ara ara yanasinta vá ano fi mai yanasinta ano ída kanaíen Tiyarafenui avábá pintena setin do siviranten mino. ³⁹ Tetí ankan dan uron ná un bá tifante rafu áa un

nompin námen ná orun bá tifante rafu mai Tiyarafenu ano ma uvamádan bain mai yanasantá ano ída kanaén tetisi Bafan Yisas Karaisin táké ma Tiyarafenu ano aní ukhein avábá pintena seti yo siviranten mino.

9

Tiyarafenu Ano Ma Isareri Kéká Aní Ukhein Baya Ino

¹ Téi Karaisini yoran bantan bákun Kantá Au-nan mano se súpin báken ineine simiyái ída kampun tin téi fura vaya anan tiyá uno. ² Ena ena yamú te súpin kákán tirunan ná édaviyáká kokhon ineine anan iyá báé iyá uno. ³ *Isareri kéká ma se siyofi sifá tiváeyon ma vain mai Tiyarafenu ano evaránen avirano van mi iniyá uno. Téi ma Karaisin pinte yo sisintan nain mano ma vetin ayairí ma ukhantin mai kasaen téin tisintano van mino. ⁴ *Betí ankan Isareri nanin bantan bákán mi Tiyarafenu ano vetin nan be akhafana e sikhen mino. Tiyarafenu ano vei kakhan má ákona vá betin aní uren betí ankan má ará manafin kasen ban avúavái aníen bei mán bayá amen mino. Amiren monó tin avúavá betin aní uantáden kama yaná iyántan ban mino. ⁵ Pefá betí anafu aráo ano Tiyarafenu iorampin aví bain nanin bantan baré íkan mi Karaisi ano vetii kékápin mi vantaén mino. Karaisi véi Tiyarafenun báken minó danáká dafiken mifo ena ena yamusá ben aví daní ó tifano. Mai fura ino.

* **9:3:** Eks 32:32 * **9:4:** Eks 4:22; Riv 1-10; Íbo 147:19; Rom 15:8; Ibu 9:5

*Tiyarafenu Ma Iyáantan Daná Ma Varé Iyain
Mai Vei Anunurái Amé Iyan Mino*

⁶ Tiyarafenu ano ma Abaraamun iyáantákaré ein bayá ano ída fa savifá afe en mino. Ída ino. Para vara seyo, Yekopun ana akhá pinté ma e afoká iyain kéká ano seti Isarerí kéká uno siyan mifo ída fura sen Tiyarafenurá mumunan ukhen mino. ⁷ Abaraamun pinté ma ayuman ukhein nan mi véin ana akhafanan bá uno siyan mifo vetí ankan ída fura sen ben ana akhafanan ban mino. Para vara seyo, Tiyarafenu ano gefá Abaraamun máa sen tiamicaharemí, “Kokhon iyampon kaesin banten mifo Aisakin pinté ma ayuman inain nanin banta mai senti kékái vantén mino.” *Esé 21:12*

⁸* Mai vayai ana máan mi ukhen mino. Abaraamuni nare ráké ma afoká ukhein mai iyampon kéká pinté manáa anon Tiyarafenu akhafanaí ukhen mifo Tiyarafenu ano ma iyáontantá ma mumunan in avúavá káké ma afoká ukhein mai kéká san mi Abaraamuni kéká se siyan mino.

⁹ Mai van mi Tiyarafenu ano máa sen iyáan temí, “Mai ma sikará onuna yamú ma séi ovaráné erékuñ maen Sara ain iyampon kainten mino.”

Esé 18:10, 14

¹⁰ Mai ma sikharé ein iyampon teti sinafu Aisakin mi kain baren e anoní uaren Revekan mamáken ain iyampon kanan karina kaen mino.

¹¹⁻¹² Reveka karina iyampon kanan kauran maen Tiyarafenu ano míkani kama avúavá bá namu avúavá bákasa ódaren aníen naino. Ída ino. Tiyarafenu ano vei anunurái mana aníen mino.

* **9:8:** Kar 4:23

Béi fe o útúben Revekan tiamikharen mino. “Esé ma ká inain iyampon mano ínaín ma afoká inain iyamponi yoran bantaí inten mino.” *Esé 25:23*

Mai ma siamikhárén ma afoká ein avúavá ano Tiyarafenui ineine ánaín mi vákuren mifo seti ma kama yoran má namu yoran má ma variyarunara saino. Ída ino. ¹³ Tiyarafenui vompon dóki ano máa sikhen mino. “Téi Yekopun nan mi sinunu iyá umpo Iso nan ída sinunu iyá uno.” *Mar 1:2-3*

¹⁴ Mai van Tiyarafenu ano ída funtákein avúavasíi iyan minó té tifante rafuno. Ída ino. ¹⁵ Mai fara vara seyo, Tiyarafenu ano Mosesin pefá tiamikharen mino,

“Téi mana vanta ma sirunan uantano van tesi sinunurái máan té iyá uno.

Inká téi mana vanta ma avábá uantano van tesi sinunurái máan té iyá uno.” *Eks 33:19*

¹⁶*Máan tukhan mi Tiyarafenu ano ma iyáantán daná ma varé iyain mai ída vanasii anunura safi yoranta safi varé iyan mino. Ída ino. Tiyarafenu ano vei anunurái amé iyan mino. ¹⁷ Para vara seyo, vompon dókifin Tiyarafenu ano ena vaya máa sen Kin Feron tiamikharen mino. “Éin ma maman kiní uréku vaona mai sesi kákán ákoná éintá aní urékun ten tiví ano ma varará orera ino van muno.” *Eks 9:16*

¹⁸ Máan tukhanti seti afova sá ó tifano. Tiyarafenu ano manáa kéká ma arunan uantano van mai vetin arunan uanté iyan mino. Inká béis ma manáa kékái ineinerá ma yasirádantin baya ída inino van ma é iyain mai vei anunu fóké máan té iyan mino.

* **9:16:** Efe 2:8

19 Tiretí ankan pinté manáa ano máa sin nono. “Tiyarafenu ano veyantá ma yuvun intin banasi ano namu avúavá bariyan nain nan mai fará tenti vaya ída iniyá uno sen béisinten nafino.”

20 Ída vá máan baya seno. Éi varará banta ano iyé bakeyá Tiyarafenu ano ma vara nain avúava san asinte fono. Kave ano kañaisá en ná ben ma uvarein banta van ten ná, “Éi fará téin máan uvararí e fono” *Ais 29:16; 45:9*

21 *Kave uvaran banta ano ma kankanan kave uváden maen mana kaverá kamaen bompon uren mai kave kama yorarí in kaen inká ena kave fara ena yorarí in uvaman kaen é iyan mino. Mai avúavá ano ída puntáken nafino.

22 Tiyarafenu ano véimpin ákona vantin pasen banasi yaiminten mino. Máan tinten mifo inká beimpin ákona vantin kasaen mai ma veni vaya átakharé inain kéká ave ukharen ínaimpákéi yaíden uman aminten mino. **23** Mai fara va ino véimpin ákona van bei arunanápin ma aviádantin bano ma sikhein nanin banta vá deren bei kakhan aní intin onanten mino. **24** Tiyarafenu ano ma sen Yutan kéká bá ena anan nanin banta kayo vái arakhé uno ma siyain mai setin nan mi siyan mino.

25 Sakhanampa vanta Oseani vompon dókifin Tiyarafenu ano ena anan nanin banta kayo van máa sikhen mino.

“Mai mafefá ída senti yanasi varé ein mai ínaimpáké tesi vanasi oe sé aranté uno.

* **9:21:** Yer 18:6

Inká mai ma ída sinunu iyaréeruna kéká
 ínaiimpáké móeké tinunu ukheruna kéká
 ino senté uno.” *Ose 2:23*

²⁶ Inká ena anafin máa sikhen mino.

“Ída senti vanasi ono’ ma sikháré inain kéká
 san ínaiimpáké ‘taunan bain Tiyarafenu
 sikhafana ono’ sinten mino.” *Ose 1:10*

²⁷ Isareri kéká san Aisaiya iniyáken ovaraaren
 temí,

“Isareri nanin banta ano kokhoníen non
 akhempá ma vain eyu an ma yesin maen
 Bafan mano manáa nanin banta anan avi-
 ranten mino.

²⁸ Para vara seyo, Bafan mano varará nanin banta
 ainen mi
 kó tiantáden uman aminten mino.” *Ais*
10:22-23

²⁹ Inká ena anafin Aisaiya máa sikhen mino.

“Minó ákona ma vain Bafan mano
 setin tinafu siráon manáa ída áen baren
 mai Sodomu vá Komora vá ma einiéen
 minó tiruan kípanté ein mino.” *Ais 1:9*

Isareri Kéká Ma Ída Mumunan Ein Baya Ino

³⁰ Mai avúavá san tetí ankan inte esá tente
 rafuno. Máan ná té tifano. Ena anan nanin
 banta ano Tiyarafenu van ída yosiyan mifo vetíi
 mumunantá Tiyarafenu avorá puntákein nanin
 bantan ban mino. ³¹ Ban mifo Yutan kéká ano
 man bayá ánaín dakhadé puntákein nanin bantaí
 ono yan en mifo ída kanaíen mai avúavá baran
 nainiéen mino. ³² Mai fara fino. Mumunan ma
 uren Tiyarafenu avorá puntákein nanin bantaí
 oren mi man bayá ánaín dakhafiyá kama avúavá
 baranté uno sen inikharen mino. Máa sen
 inikhan betimpin ída mumunan bákan mai ano

kákán onámaná ma aasá bainí ukharéin eyúpóen ankamen mino. ³³*Tiyarafenui vompon dóki ano mai van mi afova amikharen mino.

“Ineno. Banasi ano ma eyúpó en ma eraven ankamin nain onámaná

Yerusaremí kaonté uno. *Ais 8:14*

Mai onámanáká ma mumunan inain nanin banta
ano

ída ayave van inten mino.” *Ais 28:16*

10

Isareri Kéká Ano Ma Tiyarafenui Avúavá Ída Afová Ukhein Baya Ino

¹ Mumunan tiyofi sifá tiváeyan noe, Tiyarafenu ano Isarerí kayo aya uren evaránen avirano van mi sen tú ano vetin nan moéken anunu iyákái Tiyarafenu vaípá timúkuán amé iyá uno. ² Téi afová ukhékun Tiyarafenun ma anunu ukhein avúavá áncuin dakhafiyá uno siyan mifo véin ánaín ma yakhafin mai avúavá betí ída afová ukhen mino. ³ Mai fara vara seyo, Tiyarafenu ano ma vetin maman puntákein nanin bantaí ma in aa ída afová ukhen mino. Man baya ánaín ma yakhafin avúavúpokéi Tiyarafenu avorá puntákein nanin bantaí onté uno siyan mifo Tiyarafenui funtákein ine inerá ída oriyan mino. ⁴ Mosesini man baya inka Karaisi me kanaí ukhein minó nanin banta ano ma mumunan inteya mai Tiyarafenu avorá puntákein nanin bantaí inono.

Mumunan Nanin Bantan Ma Tiyarafenu Evaránen Aviran Nain Baya Ino

* **9:33:** 1Pi 2:6

5 “Minó man baya ánaín ma yakhafin nain nanin banta anon Tiyarafenu avorá puntákein nanin bantaí inten mino” sen Mosesi vompompin uvantaren mino. *Riv 18:5*

6 Máa sikhen mifo Tiyarafenu avorá ma funtákein nanin bantaí inain nan máa sikhémí, Yisas Karaisi aya ino van “ída kanaí e inaru fáke un avire eran nono.” *Diu 30:12*

7 Inká máa sikhémí, “Yisas Karaisin evaráne avíán mantao van ída kanaí e furin nanin bantai varufin aravin nono.” *Diu 30:13*

8 Yisas Karaisintá ma mumunan esin Tiyarafenu ano saretin evaránen aviran nain nan bompon dóki ano máa sikhen mi, “Mai vaya ano yákó bákayai kasae vanasi siamiyan nan tiretin aúpin ban mino.” *Diu 30:14*

Mai vaya anan teti siamiyá uno. **9** Mai fara vara seyo, saretin pinté mana ano ma Yisasi nan Bafan mino sireya ma Tiyarafenu ano masí pintena véin avíán mantakhen mino seja aúkáké mumunan inteya mai Tiyarafenu ano éin evaránen aviranten mino. **10** Mai fara vara seyo, setí túkáké ma mumunan iyarunarái Tiyarafenu ano setin nan puntákein nanin banta e sé iyan mino. Máa sé iyan mifo inká too fóké ma setisi mumunan tian amá iyarunarái Tiyarafenu ano setin evaránen tiviranten mino. **11** Tiyarafenui vompon dóki ano mai van máa sikhen mino. “Béintá ma mumunan inain kéká ano ída ayave van inten mino.” *Ais 28:16*

12 *Yutan kayo vá Kiriki kayo vá mai manaí anan ukhan betí Bafan mana anan bákán mi vetí ankan ma inantein danasinta manaí uren amé

* **10:12:** Apo 15:9

iyan mino ¹³ Mai fara vara seyo, “Bafan aví ma aran nain nanin banta mai véi aya uren betín evaránen aviranten mino.” *Yoe 2:32*

¹⁴ Aviranten mifo vetí ankan ma ída véin nan mumunan iyáken intesá urená ayain nan be vaípá inantinten nafino. Beti ankan ída ma veni vaya inikhen mai intesá uren ná bentá mumunan inten nafino. Mana ano ma vetin ída vaya siamintin maen mai yeti intesá uren ná beni vaya ininten nafino. ¹⁵ Baya siamino van ma ída vanta siantantin mai inté uren ná baya siaminten nafino. Tiyarafenui vompon dóki ano máa sikhen mino. “Kama vaya ma varen eriyain kéká ano setin mi simusin timiádiyan mino.” *Ais 52:7*

Isareri Nanin Banta Ano Tiyarafenui Kama Vaya Kayo Iniyán Mifo Mairá Ída Mumunan Éiyan Mino

¹⁶ Timiyan mifo ída minó nanin banta ano mai kama vaya inikhen mino. Mai fara vara seyo, Aisaiya máa sikharen mino. “Bafan noe, setí ankan ma vetin tiamiyaruna vayará iye anó mumunan ukhen nafino.” *Ais 53:1*

¹⁷ Karaisiní kama vaya ma inin avúavá anon mumunan afoká é iyan mino.

¹⁸ Máan tukhen mifo Yutan kayo ano fura sen ná mai vaya inikhen nafino. Eyo inka inikhen mino.

“Tiyarafenu ano ma minó danasinta uvantein baya ano

inka minó nanin bantafin oriaren
mai vaya ano minó barafá orera ukhen
mino.” *Íbo 19:4*

19 Orera ukhen mifo mai fura sen ná Isarerí nanin banta ano minó bayai ana afova suren ukhen nafino. Eyo mai fura sen betí ankan afova suren ukhen mino. Para vara seyo, Mosesini yamú dere Tiyarafenu ano máa sikharen mino.

“Ena vara fákena ída aví bain nanin banta séi avábá uantanuna van tiretin ará uman daantán nono.

Inká ena anan nanin banta ma ída afova vain kayo ma avábá uantanuna van tiretí ankan betin aranan uantan nono.” *Diu 32:21*

20 Máa siran ínaímpáké Aisaiya ano Tiyarafenu van máa semí,

“Téin nan ma ída yosiyaré ein kéká avorá inka yákó é uno.

Téin nan ma ída iniyá ein kékápin inka seyan aní é uno.” *Ais 65:1*

21 Máa sikhan mi Isarerí nanin banta van iniren Tiyarafenu ano semí,

“Minó damú betin ariyákun mifo senti vaya átakharé uren ten toofá do yuriyan mino.” *Ais 65:2*

11

Tiyarafenu Ma Isarerí Nanin Banta Arunan Uantein Baya Ino

1 *Tiyarafenu ano Isarerí kayo me oyan amikhará téi siya rafuno. Ída uron mino. Téi Abaraamun pinté ma ayuman ukhein Bensamenin anan bantan báke Yutan bantai vá umpo afova sá ono.

* **11:1:** 1Sa 12:22; Íbo 94:14; Fir 3:5

² Máan tukhékun Tiyarafenu ano gefá aráí in táké ma veinaí ukhein nanin banta ída me ampikhein mino. Mai van ma vompon dóki ano sikhein tireti ída afová ukhe fono. Sakhanampa vanta Iraiya ano Isarerí nanin banta ayaino van Tiyarafenu vaípá ákonæn máa sikhen mino.

³ “Bafan noe, eni sakhanampa vanta kéká minó aruan púden éin ma íkun uan amin kará kayo vá dere varakuariyan karúdará teya anan ukhékun téin má tirono van dakhafiyá uno.” *1Ki 19:10, 14*

⁴ Máa síkan Tiyarafenu ano ma evaránen béin tiamein mai vaya afová ukhe fono. Tiyarafenu ano semí, “Éi ída eyaká ana vaono. Dan manápá ifo afápá kan un kádan tauseni (7,000) ano ma kampun ayarafenu rá ída monó tiyain kayo vá deren para van mino.” *1Ki 19:18*

⁵ Máan tukhan taréa minó Yutan kayo vá dere Tiyarafenu me ampikhen naino. Mai ma Tiyarafenu ano sarisari uren avíkaré ein nan manáa ano fara van mino. ⁶ *Máan tukhan betíi yorantasá avíken naino. Tiyarafenu ano vei sarisari rái avíken mino. Betíi dorantá ma avíkantin maen Tiyarafenui sarisari ano ída fura yanasií inten mino. ⁷ Máan tukhen mifo mai seti inte esá té tifante rafuno. Isarerí kéká ano mai yaná barano van ákona yorari uvákon den mifo ída varan nainien mino. Betíi kéká pintena mai ma Tiyarafenu aní uran ben ninaí ukharé ein máa anon baren mifo minó kayoi ineinerá dasirákaren mino. ⁸ Tiyarafenui vompon dóki ano máa sikharéin mino.

* **11:6:** Kar 3:18

“Tiyarafenu ano vetin maman purin banta an
daran aunká bakhen
eriyaren taréa vetin aurá iyádan ída onaríin
átaren dasíkaran ída vaya iniyán mino.” *Diu
29:4; Ais 29:10*

⁹ Devitin má dere máa sikhen mino.

“Aesin ná beti ma omasí inaín mano maman betíi
oyivan an davintin ná
anuran ariyan nain nan kana vá uno vá tino.
Aesin ná mai amusin mano sin nainén uman
barano.

¹⁰ Áesin ná betin auu yufúkuvintin ída vá onano.
Áesin ná uman mano amininá ódiven ayorun
davénarantin ná mátinten bano.” *Íbo
69:22-23*

*Ena Anan Nanin Banta Ano Afá Orifi Yaa An
Dakhá In Ma Tiyarafenu Ano O Iyaaren Ayun Táke
Orifi Yaará Ma Asótú Ein An Dakhein Baya Ino*

¹¹ *Máa sikhen mifo mai fura sen ná Isarerí
nanin banta ano eraven ankanten ídá evaránen
e mantanten nafino. Ída uron mino. Betí ankan
ma Tiyarafenu oyan amiayin nan mi Tiyarafenu
ano ena anan kéká evaránen avídantin Isarerí
kayo ano ódaren tetin mana sivirano van muno
siren aranan ino van mino. ¹² Isarerí kéká
ano ma Tiyarafenu oyan amiran mai van mi
ena anan nanin bantafin Tiyarafenu ano avábá
amikhen mifo ínaiimpáké Isarerí kéká ano ma
Tiyarafenu vaípá ovaránen erintin maen minó
nanin bantafin beni avábá ano mo kákani suron
inten mino.

¹³ Mai van mi sireniená anan nanin banta ma
vaona van mi séi siyá uno. Ena anan nanin

* ^{11:11:} Apo 13:46

bantafin bayá varen orino van ma Tiyarafenu ano séin aní ukhein mai kákán doran uron mino. ¹⁴ Mai fara vara seyo, Tiyarafenu ano ma sireti ena anan nanin banta kama avúavá uantan nain mano Isarerí kayo auu yavo sintin Tiyarafenu ano senti yorantá betin pinte manáa ovaránen avirano van muno. ¹⁵ Mai fara va ino. Tiyarafenu ano Isarerí nanin banta oyan amiren mai van mi sireti ena anan nanin banta avíden avábá uanten mino. Máan ten mifo Yutan kayo ano ma Tiyarafenu vaípá ovaránen erinten maen mai fükären ma e manteinií intin Tiyarafenu ano vetin moéken avábá inten mino. ¹⁶ Abaraamu má Isarerí kayo ma ayuman in banta kéká bá ano ma kantasí ukhantin maen mai vetin ana akhafana vá ano yeren kantasí inten mino. Inká daa arú kayo ano ma kama ukhantin maen mai yaa ayan kayo vá ano yeren mo kama inten mino.

¹⁷ *Máan tukhan maen Isarerí kéká ano mai ayuntáke orifi yaa ana an mi yakhá en nan mi Tiyarafenu ano manáa ayan iyaren do varen mino. Do máden inká tireti ena anan nanin banta ano mai afá orifi yaa an mi yakhá en nan Tiyarafenu ano o iyaaren ayuntáke orifi yará ma asótú einíen mino. Máan turai saréa saretí ankan ayuntáke orifi ayan ma einí uveyan mai yaa fintena anu variyákeya ana variya vaono. ¹⁸ Máan tukha ompo ída vá mai ma iyaan karúdakhein ayan kayo van esantakhé uno se ineno. Tireti ma máan ineine ma iyanteya mai sireti afova sá ono. Ída yaa ayan mano arúpin anu aminten mifo yaa arú anoi yaa ayampin anu aminten mino.

* **11:17:** Efe 2:11-19

19 Amé iyan mifo saretí ankan ída vá teya “Tiyarafenu ano mai ayan kayo síkaran bain téin maifin asotú inten mino” sire avan avan ono. **20** Mai fura máan tin nompo Yutan kayo ano ma ída mumunan ein nan mi Tiyarafenu ano yo síkaan karúdakhen mino. Tireti ankan ma mumunan eona van mi maifin maman asotú ura va ompo ída vá avan avan iyákeya sretin ma Tiyarafenu ano yo síkaan karúdan nain mai vará perano. **21** Para vara seyo, Tiyarafenu ano gefá ma varé ein daa ayan ma yo síkakhanti mae mai saretí ankan má dere yo síkanten mino.

22 *Máan tinten mifo Tiyarafenu ano kamaen avábá iyáken inká ákonaen baya siyan é iyan mifo afova sá ono. Mai ma Tiyarafenu oyan amé iyain kéká bái auufen kakháben ákona vaya sé iyan mifo véin nan ma anunu ein kéká bái avové uren kama uanté iyan mino. Tireti ma véin purase oyan amesin maen bén má deren tiretin oyan aminten mino. **23** Mai ma gefá daa ayan kayo ma sikakháré ein mai Yutan kéká san mi sikhein mai veti ma mumunan intin maen Tiyarafenufin ákona vantin kasaen evaránen maman mai ma síkakhareéimpin asótú inten mino. **24** Tireti ankan afová ukha ono. Tireti gefá afá orifi yaa ayan an mi yakharé en nan Tiyarafenu ano síkaren ayuntáke orifi yaa anará mo asótú ura vaompo mai ída éi mai finté yaa ayan uron mono. Máan tukhantin pasen Tiyarafenu ano kasaen mai ma yo síkan karúdakharé ein ayan evaránen maman asótú inten mino.

Tiyarafenui Arunanaá Mai Minó Nanin Banta

* **11:22:** Yon 15:2, 4

Ina Ino

²⁵ Ena anan nanin banta ma mumunan iyaona kéka soe, aúpá baya sireti afová ono van muno. Ída vá teya Tiyarafenu ano Isareri nanin banta inka me oyan amiren teti nan mana iniyá uno sire au khákən ono. Manáa Isareri kékai ará bá ineine vá ano ákona ukhen bantin ma ena anan nanin banta kayo ano mumunan en maifin mun asótú uvintin mi máon tinten mino. ²⁶ *Mai aa sákéi minó Isareri kayo evaránen avirantéin mi Tiyarafenui vompon dóki ano máa sikhen mino. “Isareri kéká ma aya ino van ave ukharé ein banta ano Yerusaremíké emanten eren me ayaintin

Isareri kéká ano ma Tiyarafenu oofá átakharé iyá ein avúavá me an pinten mino. *Ais 59:20-21*

²⁷ Ampirantí maí damuí séi vetíi ume arúantadé tirá manafini é kasé banté uno.” *Yer 31:33-34*

²⁸ Isareri kayo ano Yisasini kama vaya oyan amiran mai anon Tiyarafenu vá namuroíen mino. Namuroí ein nan mi Tiyarafenu ano vei avábá po ena anan nanin banta ayaen mino. Ayaen mifo fefá ma Abaraamun ana akhápin ma iyáan takharé ein nan mi Tiyarafenu ano veinaí ukhein bákən taréa vetin nan para anunu ukhen mino.

²⁹ Mai fara vara seyo, Tiyarafenu ano ma veinaí ono siren aren ma inká bei amusin amen ma uran nain daná ída evaránen do varanten mino. ³⁰ Pefá tiretí ankan Tiyarafenui vaya átakharé iyare ompo saréa Isareri kéká ano ma vaya átakharé iyain mai anarái Tiyarafenu ano siren tarisari uanten mino. ³¹ Mai ma fefá baya átakharé iyá

* **11:26:** Ais 27:9

eonaíen mi saréa Isarerí kéká ano Tiyarafenui vaya átakharé íkan mai van mi siren tarisari uanten mifo maná damusí ma intin maen betin má deren Tiyarafenui sarisari varanten mino. **32** Minó nanin banta ano vaya átakharé uran mi Tiyarafenu ano vei sarisari aní ono van mi vetí ume avúavá san karavusií uádán baren mino.

Pori Ma Tiyarafenu Aví Daní Ein Baya Ino

33 *Óodo. Onano, ven nina yanásinta vá afova vá ineine vá ma moékakhein Tiyarafenu ma vain nee.

Onano, véi ma ineine ureñ bariyain avúavá mai seti ída kanaié afová ó tifanté uno.

34 *“Iye anó Tiyarafenu ma ineine iyain afová inte fono.

Inká iye anó kanaíeyá véin ineine aminte fono.” **Ais 40:13**

35 “Iye naré Tiyarafenu mana yaná amiresin ná anona éin ovaránen aminten nafino.” **Yop 41:11**

36 *Para vara seyo, Tiyarafenu anon minó daná uvamá daran beni ákonará báken mai yanásinta ano véin kákán bí amiyan mino. Béin avisá ena ena yaní ono. Mai fura ino.

12

Minó E Au Ma Tiyarafenun Íkun Uan Amin Baya Ino

1 *Máan tukhein nan ma sireti mumunan nanin banta ano ma Tiyarafenui arunana san ma ovare

* **11:33:** Ais 55:8-9 * **11:34:** 1Ko 2:16 * **11:36:** 1Ko 8:6

* **12:1:** Rom 6:11, 13; 1Pi 2:5

me iniyaona kayo oe, minó bukhafa vá Tiyarafenu ma íkun uan amiyain an deya vá ameno. Máon ma inteyan bení vanasií esin Tiyarafenu ano moéken amusin inten mino. Tiretí ankan ma máon tinteya mai fura seyan Tiyarafenurá monó tin nono. ² Tiretí ankan ída vá ma vara ráke avúavá ánaín dakhafiyákeya áesin ná Tiyarafenu ano saretíi ineine maman auyení uranti vá puntákein avúavá basá nono. Máon ma urantian inte yanásá Tiyarafenu avorá kama ukhan ná ben ma amusin amin avúavá ban ná puntákanti varano van béis inikhen nafi mai afová inono.

Tiyarafenu Ano Ma Setin Ara Ara Yorarí In Amusin Timikhein Baya Ino

³*Tiyarafenu ano vei sarisari fói séin aní uren bei yorarí ino sikhái sretin tiampiyá uno. Tiretí ankan ída vá teya setisi sivútivá ano ena kéká esantakhen mino seno. Tiretíi ineine yaídeya afová ure vá tiretíi mumunantá ma Tiyarafenu ano amikhein doran ná puntáde yorano. ⁴*Tetisi minó bukhafa ano ída mana yorarí ana é iyan mifo mana mana vukhafa ano veyan ara ara yorarí i é iyan mino. ⁵ Máon manan é tetí minó ano Karaisini mana mana vukhafa an mi yakhé tiféi ara ara yorarí ó tifanté uno. Karaisin má mana vukhafaí ma ukhantesá ben aya ven aya é dorá tifano.

⁶*Tiyarafenu ano setin ara ara yoraríin amusin paran timikhen mino. Máon tukhanti ma

* **12:3:** 1Ko 12:11; Efe 4:7; Fir 2:3

* **12:4:** 1Ko 12:12, 27

* **12:6:** 1Ko 12:4-11; 1Pi 4:10-11

sakhanampa vara sin afova éin amikhantiya mai ei mumunantasá Tiyarafenu ano ma siamin nain baya seno. ⁷ Inká banasi ayain afova ma éin Tiyarafenu ano amikhantiya mai kama ure vá banasi aya ono. Inká arú dorariín afova ma éin Tiyarafenu ano amikhantiya mai kama ure vá afova ameno. ⁸ Inká ará bá ineine vá ákona uantan afova ma amikhantiya mai yorarisá ono. Inká ona avaríin doran ma amikhantiya mai aúkáke sá avarí ono. Inká Tiyarafenu ano ma yafisin doran ma amikhantiya mai fura yorarisá ono. Inká éin ma ena sarisari in doran ma amikhantiya mai amusin iya vá dorano.

Ena Ma Avábá Uantan Baya Ino

⁹ Ena nanin banta ma avábá ono van pura se aúkáke sá avábá ono. Namu avúavá oyan amireya funtákein avúavá sá pákaan ákona ono. ¹⁰ *Tireti ankan Tiyarafenui vanasi vá ara amireya e afá aváeyan ma avábá iyaonai sá ono. Tireti ankan eyan maman bararasí ure vá ena aví ana vá daní ono. ¹¹ Tireti ankan ída vá avesara yorarí iyákeya avúavá basá Bafani yorarí ono. ¹² *Mai ma Tiyarafenu ano ma kama uantano van ma iyain nará amusin iya ave ukhe vá bano. Uman ma siretimpin afoká iyantiya mantaan ákona ukhe vá amúkiya vano. ¹³ *Tiyarafenui vanasi ano ma mana yana san ma o afasí intiya mai vetin ná aya ono. Ena varu fáke nanin banta ano ma siri vaonará ma erintiya mai vetin ná kama ure yafiseno.

* **12:10:** 1Pi 1:22 * **12:12:** 1Te 5:16-18 * **12:13:** Ibu 13:2

14 *Mumunan inona van ma vanasi ano ma siretin namu uantantiya ída vá aranan uantiyákeya Tiyarafenu vaípá amúkesin ná betin avábá ino. **15** Amusin ma inain nanin banta vasá manafin amusin ono. Inká arunaná ma varan nain nanin banta vasá tireti manafin arunan ono. **16** *Tiretí ankan banasi vá manafin ná amun amun iya vano. Tiretí ankan ída vá téimpin mana afova vá uno sire kákán banta an diyákeya fara nanin banta vasá manafin bano.

17 *Tiretí ankan ma namu avúavá uantantiya mai ída vá anona evaráne vetin namu uantano. Ída ino. Minó nanin banta ano ma siretin kama ineine uantaren avúavasá ena ena yamú barano. **18** Minó nanin banta vá ma ará manafiní uren ma kusen ban aa vará ákona e yoseno. **19** *Te sirona kayo oe, siretin ma namu uantantiya anona ída vá evaráne vetin namu uantano van iyákeya Tiyarafenui ayampin ná ampiádano. Mai fara vara seyo, Bafan mano vei vompon dókifin máa sikhen mino.

“Namu uantan ayá ma amin mai senti yoran mino.

Namu ma uantein ayá téi vetin afova amenté uno.” *Diu 32:35*

20 *Máan tonté umpo mai ma vompon dóki ano sikheinisá ono.

“Namuro kéká ano ma arafan nan intiya yunan ná betin ameno.

Inká non nan ma intiya non ná dáan ameno.

* **12:14:** Mat 5:44; 1Ko 4:12 * **12:16:** Pro 3:7 * **12:17:** 1Te 5:15 * **12:19:** Mat 5:39 * **12:20:** Mat 5:44

Tireti ma máan tesin maen betí ma namu avúavá bariyá ein nan ayave inten mino.” *Pro 25:21-22*

21 Ída vá áesin namu avúavá ano siretin maman bararasí ino. Kama avúavá posá namu avúavá maman bararasí ono.

13

Kamanini Ará Naópá Ma Van Baya Ino

1*Minó nanin banta ano vá kamanini aránaopa sá bano. Para vara seyo, Tiyarafenu anon kamanin doran kain bákən béis anan minó kamanin ákonə amikhan doriyan mino. **2** Máan tukhanti kamanini man bayá ma ída inin nain kéká ano mai Tiyarafenu vayan átakharé iyain ínaimpáké uman baranten mino. **3***Para vara seyo, kama avúavá ma variyain kékasa kamani ano akhokho amen novara ino. Mai ma namu ayúavá ma variyain kékai akhokho ameno van mino. Máan tinten mifo kamanin mano ma inikhein avúavá ana ma yakhafinteya mai kama iya ono siren amo sinten mino. **4** Tiretí ankan ayaintiya kama e vano van mi Tiyarafenu ano kamanin kain ban mifo sreti ma namu avúavá bariyá inte veni miyan baran nompo vá perano. Namu avúavá ma uran nain ma yaíden evaránen miyan amin nain mai anarái Tiyarafenu ano kamanin ákonə amiren kain ban mino. **5** Máan tukhanti vá kamanini aránaópá báke vá namu avúavá bá kama avúavá bá oman afová iyákeya aau ma varan nará perano.

* **13:1:** Pro 8:15; Tai 3:1 * **13:3:** 1Pi 2:13-14

6 *Kamanin ma saretí ankan takisi amesin maen beni yoran kéká ano miyan bariyáken mi Tiyarafenu ano ma amikhein dorantá ákonæn dafisinten mino. **7** Tiretí ankan nan ma yorano sikhan nain doran purase vá dorano. Tireti ma ye nan bain danasinta vá inká enafáke ma ovariyaona yanasantará bá ma kamani ano ma sakisi van inantintiya mai kasae vá ameno. Inká tiretí ankan kamanini aránaópá báke vá kama avúavasá aní ono.

Ena Van Ma Anunu In Avúavá Ano Ma Tiyarafenui Man Baya Mo Kanaí Inain Baya Ino

8 *Ena ina yanasantá ma mantare anona evaráne amin nompo ena ma avábá in avúavá ano fara vá ban oriyan bano. Para vara seyo, ena ma avábá iyain avúavá anon Tiyarafenui man bayan kanaí iyan mino. **9** *Tiyarafenui man baya ano máon mi sikhen mino.

“Ída vá pamúkuí eya”

inká “ída vá ena aruan pureya” inká

“ída vá ena ina yanasantá umoyan bareya” inká

“ída vá ena ina yana san aran nano.”

Eks

20:13-15, 17

Mai man baya kayo vá ena man baya kayo vá anoi ma mana man bayafin manan ban mino. “Eyan nan ma anunu iyaonaíe vá ena van anunu ono.”

Riv 19:18

10 *Ena nanin banta van ma avábá iyaona ano mai vetin ída namu uantiyan nan mai avábá anon Tiyarafenui man baya mo kanaí iyan mino.

* **13:6:** Mat 22:21 * **13:8:** Mat 22:39-40; Yem 2:8 * **13:9:**

Diu 5:17-19, 21 * **13:10:** 1Ko 13:4-7

*Bafan Yisas Karaisini Avúavá Ano Ma Siretíi
Auí Daná An Ma Yan Baya Ino*

11 *Taréa ma vaona yamú mai avúavá barano van mi siamiyá umpo afovasá ono. Mai ma setin e siviranten mino sire ma araiintá mumunan iyá eona maí damú inka ádé en mifo aunan ma vakhá eona vá orun mantave auu safe seno. **12** *Mai ma yuntaré ein inka yo kakhan ádé iyan mifo ída vá dunin avúavápin báke kakhakhein avúavá po sá maman aruvin auí daná ma yampeini sá ono. **13** *Máon ture vá kakhakheintá ma noin nanin banta an de vá puntadé nono. Tetí ankan ída vá óen non nare sá óen é noké pamúku avúavá iyáké inká ena nanin banta ina yana san ída vá tirá namu uré tiruve sisive é nó tifano. **14** *Áesin ná Bafan Yisas Karaisini avúavá ano sirení auí daná an dakhanti ída vá dan bukhafai anunu ánaín dakhafono.

14

*Ena Mumunan Nanin Banta Van Ma Oyampá
Baya Sin Baya Ino*

1 *Mumunan ma ída ákona ukhein kékásá aya iyáke ída vá betí ankan ma variyain avúavá daimono. **2** *Para vara seyo, manáa ano ma mumunan iyain mai kasaé minó dunan nanté uno siren niyan mifo manáa ano auraren maen manáa yunan máon né iyan mino. **3** *Máon té iyan mifo mai ma minó dunan ma niyain kéká

* **13:11:** Efe 5:14; 1Te 5:6-7 * **13:12:** 1Yn 2:8 * **13:13:** Ruk 21:34; Efe 5:18 * **13:14:** Efe 5:11 * **14:1:** Rom 15:7 * **14:2:** Esé 9:3-4 * **14:3:** Kor 2:16

ano ída vá mai ma manáa yunan aurakhein kéká oyampá bayo se siná inká manáa yunan ma aurakhein kéká ano ída vá minó dunan ma niyain kéká daimono. Mai fara vara seyo, Tiyarafenu ano minói aviranten mino. ⁴ *Éi iyé bákeyá enai yoran bantai avúavá daiminte fono. Daimin nompo veni avúavá ano mo kama inten nafi áa namu inten nafi mai Bafan mano anan betin daíden ayaintin mantaan ákona inten mino.

⁵ *Máan mana en mi manáq ano ma inin nain mano maná damú anan moéken kantasí ukhen ne sintin inká manáa ano ma inin nain mano minó damú ano manái anan ukhen ne sinten mino. Máan tukhanti inte inin manó ei inimpin kamá ukhanten nafi mai ángin ná dakhafono. ⁶ Mai ma maná damu san inian kákan damusí uren monó tiyain kéká ano mai Bafan nan mi iniren máan tiyan mino. Inká mai ma minó dunan niyain kéká ano Bafan nan iniren Tiyarafenun naren tusu siantáden né iyan mino. Inká mai ma manáa yunan ma aurakhein kéká ano Bafan amusin uantano van mi Tiyarafenun naren tusu siantáden né iyan mino. ⁷ Mai van mi ayun ma fara van má purin má maen mai ída seti sinunurá banté tifé umpo Tiyarafenui na yaná ino. ⁸ *Bafan amusin uantano van mi ayun para vátifé umpo ínaiimpáké ma furonuna ano yere mai venina anan banté uno. Máan tukhanti seti ayun para vante rafu áa furonte rafu mai Bafan nina yaná ana ino.

⁹ Mai ma fara ayun bain kayo vá mai ma fúkein kayo vái Bafan ninaí ono van mi Karaisi ano

* **14:4:** Mat 7:1; Yem 4:11-12 * **14:5:** Kar 4:10-11 * **14:8:**
Kar 2:20

fúaren e mantakhen mino. ¹⁰*Máan tukhen mifo mai fará ena mumunan kékái avúavá daídeya vetin maman bararasí iya fono. Tiyarafenun avorái mana mana ano mantavékun mi setin daiminten mifo afovasá ono. ¹¹*Tiyarafenui vompon dóki ano máa sikhen mino.

“ ‘Téi ena ena varuna Bafan mano fura uron té uno.

Minó ma varará nanin banta ano séi varunará eriven me aron durafúden
te nan Tiyarafenu uron mino sinten mino.’ ”

Ais 45:23

¹² Máan tukhein nan mi setí afová ukhé tiféuno. Minó teti ma variyaruna sivútivá Tiyarafenu siamékun ná béis ana vá daimino.

Ena Mumunan Nanin Bantai Avúavá Ma Ída Yaimin Baya Ino

¹³ Máan ná tin nompo ída vá mumunan nanin bantai avúavá daimin maran ono. Máan ma ótifanuna anoi vetíi aa iyará tifanté uno. ¹⁴*Bafan Yisasi ano senti inin amá usintá pura sé afová ukhékun mana yunan ma nan mano ída veyantá Tiyarafenu avorá painí ukhen mifo vantafó ma Tiyarafenu avorá namu ukhen ne siren ma mumunan inté inti mai vanta avorá mai yunan pura sen namu ukhen mino. ¹⁵*Máan tukhantin ma inká éi niyanona van ma ena afá aváe ano ará namu uantantiya mae ma éi ída véi ará amiya ompo ída vá mai yunan nano. Para vara seyo, Yisas Karaisi véi ma san mi fúken mifo ída áesin éini yunan nan mano véin mamádantin umefin

* **14:10:** 2Ko 5:10 * **14:11:** Fir 2:10-11 * **14:14:** Apo 10:15;
Tai 1:15 * **14:15:** 1Ko 8:11-13

eraven ankan mino. **16** Máan tukhantiya ída vá áesin ena mumunan nanin banta ano éi ma kama ukhe ne se inin nona yana san namu yaná ino vá tino.

17 Para vara seyo, yunan má non má ma niyain mai ano va Tiyarafenui yafisimpin kákán danasí ukhen naino. Mai ma funtákein avúavá bá ará kusin má amusin in avúavá bá ma Kantá Aunan mano setimpin afoká é iyain mai anoi kákán danasí ukhen mino. **18** Tiretí ankan ma Karaisini yorarí iyákeya máan avúavá ma varesin maen mai Tiyarafenun mi amusin amesin banasi ano yere siretin nan kama yorarí iyan mino sinten mino.

19* Máan tukhen mifo setisá ena nanin banta vá manafin tirá kusé bákesá mumunan avúavápín ben aya ven aya ó tifano. **20*** Tiretí ankan ma niyaona mai yunan naro sire ída vá Tiyarafenui yoran máde asuse ono. Minó dunan kama ukhen mifo mumunan kéká ma mamádantí umefin eraven ankamoren dunan ma nan nain manon mai namu inten mino. **21** Mumunan kéká ano ará uman daantáden ma eraven ankamoren mai safúna fi uvaini non nafi ída vá niyáke inká namu yaná ino ma sen afová ukhan nain daná ída vá barano.

22 Mai ma siredí ankan ída uman ban mino sireya mumunan iya ma variyaona yanasinta áin ná Tiyarafenu vá tirékan nampin mana vá bano. Inká mai ma funtákein daná ino siren mumunan iyan ma variyain kéká ano vá amusin ino. **23** Máan tukhen mifo mana vanta ano ma ída mumunan in kan inin má ma váken dunan

* **14:19:** Rom 12:18; 15:2 * **14:20:** 1Ko 8:13

nanten maen mai van béis umeíi inten mino. Béis ma ída funtákein danasinta ino sen mumunan ukhein danasinta ma varanten mai véis umeíi inten mino.

15

Ena Nanin Banta Aya Ono Van Ma Iyan Ban Baya Ino

¹ Tetisi mumunan ma ákona ukhá baruna kéká ano vá mai ma vetíi mumunan ída ákona ukhán ma umampin bain kékásá aya ótifan numpo ída vá tetiyan nan mana ma simusin timin avúavá ana variyá bá tifano. ² *Tetí ankan ná ena mumunan nanin banta ayaé tifékun ná betíi mumunan mano moéken ákona ino. ³ Para vara seyo, Karaisi má deren ída veyan amusin barano van doriyá in mai van mi Tiyarafenui vompon dóki ano máa sikhen mino. “Mai ma siren oyampá bayá siyain kayo ano mai sen timaniná kainten mino.”

Íbo 69:9

⁴ *Para vara seyo, mai vaya kayo ano setin afova simiyantí mantaan ákona ukhé Tiyarafenun ave ukhé tifékun tetin evaránen tivirano van mi fefá bompon dókifin uvantaren mino.

⁵ Yisas Karaisin ánain ma yakhafiyante mai áesin ná mai ma kama ineine amiren ákona uantiyain Tiyarafenu ano vá bei Kantá Aunan póké tiretiyan ma manafin ban avúavá amino. ⁶ Amirantii ará manafiní ure ma varanona yaná anon tetisi Bafan Yisas Karaisin afóe Tiyarafenun avíi maman daní in nono.

* **15:2:** 1Ko 10:24, 33 * **15:4:** 2Ti 3:16

7 *Yisas Karaisi ma siretin nan anunu uren avireiníe ma ena nanin banta anunu ure avirante mae mai anoi Tiyarafenun kákən bí amin nono.

8 *Tetí ankan afovasá ó tifano. Yisas Karaisi ma Yutan kayoi yoran bantaí ma ein mai anoi mai ma vetin anafu aráompin ma iyáəntákəré ein baya ano kanaí intin mai Tiyarafenu ano furan tikharen mino sino van mino. **9** *Inká ena anan nanin banta avábá uantádántin betin má dere Tiyarafenu aví daní ino van mi Karaisi eren mino. Mai van mi vompon dóki ano máa sikhen mino. “Ena anan nanin banta finté uaré éin aví daní onté uno.

Éin aví daní in í kayo yanté uno. *2Sa 22:50;*

Íbo 18:49

10 Tiyarafenui vompon dókifin enádá máa sikhen mino.

“Ena anan nanin banta kayo oe, Tiyarafenui vanasi vasá manafin amusin ono.” *Diu 32:43*

11 Inká evaránen máq sikhen mino.

“Tireti ena anan nanin banta oe, Bafan avisá daní ono.

Minó barará nanin banta oe, véin avisá daní ono.” *Íbo 117:1*

12 *Inká sakhanampa vanta Aisaiya máa sikhen mino.

“Yesin anan pinté ma afoká in nain banta ano minó barará diffibintin maen
béi anan tiya urev evaránen tiviranten mino
siren
ena anan nanin banta ano ventá mumunan
inten mino.” *Ais 11:10*

* **15:7:** Rom 14:1 * **15:8:** Mat 15:24 * **15:9:** Apo 3:25

* **15:12:** Rev 5:5

¹³ Mai ma ameno siren iyáantáka ave iyaona Tiyarafenu vaípá timükékun ayainti mumunan esin amusin má ará kusin má bïkaantanten mino. Mai ma varano sire ave iyaona inimpin Kantá Aunan mano moéken ákona amintin mantaan ákona in nono.

Pori Ma Vompon Uvarein Bayai Ana Ino

¹⁴ Mumunan tifá tiváeyan noe, Tiyarafenui kama avúavá inka sireti afová uren nan mai yanásinta ano saretimpin bíká téi fura siré afová eruna kasae ena nanin banta mai vaya afova amin nono. ¹⁵ Tiyarafenu ano sein tarisari uren doran timikhá ein nan mi manáá ákona vaya saretin uvaman ameruna mai ano kasaen tiretin ineine aminten mino. ¹⁶ *Tiyarafenu anon ena anan nanin bantafin Yisas Karaisini kama vaya mo siamino van mi séin aní uren monó ánon banta ano ma yoriyain avúaváká ten nan dorano van mai yoran timen mino. Kama vaya mo siamékun Kantá Aunan mano vetin ayaintin Tiyarafenu ano ma ará manafíní é iyain íkun uan amin an dantin pura sen betin maman bei vanasií ino van muno.

¹⁷ Máon tukhái Yisas Karaisi ma seimpin báká ma Tiyarafenui yorarí iyaruna van mi simusin iyá uno. ¹⁸ Téi ída ena yanásinta van baya seno van mumpo mai ma Yisas Karaisin pákena van ma siyá bariyá iyarunará ma ena anan nanin banta e mamádan Tiyarafenui oo yaiiyain mai vaya anan tenté uno. ¹⁹ Ara ara enará ukhein daná ma afokáin ákona Tiyarafenui Aunan mano séin timikhá Karaisini kama vaya Yerusalemí ké

* ^{15:16:} Rom 1:5; 11:13

araí uré avové é banasi e siamé oriyá Iririkumí barafin mo kanaí é uno.*

²⁰*Tenti ákona inin ma vain mai Karaisini kama vaya ma gefá inikhein akhempá ifá uré mai ma ída inikhein nanin bantafin ma mo siamin nan mi sinunu iyá uno. Ena vanta ano ma namádan daféadantá ma uvareiní ída ono van muno. ²¹Tiyarafenui vompon dókifin máa sikhen mino.

“Mai ma Tiyarafenui vaya ída siamikháin nain
kéká ano onantin
inká mai ma veni vaya ída inikharéin nain
kéká ano afová inten mino.” *Ais 52:15*

²²*Mai ma Tiyarafenui vaya ída inikharé ein
barufimpái siamé noké tiretin ída ainé o oné uno.

Pori Ma Romú Orono Van Ineine Ein Baya Ino

²³Ída ainé oné umpo mai varafimpá ma yoré noré eruna inka saréa me kípé uno. Tiretin nan kokhon oranarái o ineine é eriyá baréi saréa saretin o onano van iyá uno. ²⁴Spenii varafá ma oronté maé tiretin naren e odé oronté uno. Tiretin má ma manafin o varééku mae sretíi aaí usintesí oronté uno. ²⁵*Oronté umpo monó nanin banta ma Yerusaremí bain naren mo amusin moní amiré ínaimpákéi oronté uno. ²⁶*Mai fara vara seyo, Masedoniaú Akaiauí varafá ma Tiyarafenui vanasi vain mano Yerusaremí ma Tiyarafenui vanasi váken manáa yana san ma o útufiyain kékápin dantin ma orin nain danasinta van betiyan baya sian damuré

* **15:19:** Iririkumí mana Ítarí adé ma vain bara ino. * **15:20:**

2Ko 10:15-16 * **15:22:** Rom 1:13 * **15:25:** 1Ko 16:1-4

* **15:26:** Apo 24:17; 1Ko 16:1; 2Ko 8:1; 9:2, 12

moní átaru ono van iniyán mino. ²⁷*Betí ankan amusin mái mai avúavá bariyaren mino. Mai fara vara seyo, Tiyarafenu kama vaya ma Yutan kéká pintena varein mai ayái anona moní átaru uren evaránen aminten mino. ²⁸Mai moní ma átaru urantí baré mo amirékun ma mamarantí maé íngimpáké Spení ma orono van tiretin naren e oné oronté uno. ²⁹*Téi fura sé afová iyá umpséi ma sireti vaonafá ma oronuna mai Karaisini kákán avábá bái oronté uno.

³⁰*Mumunan kéká soe, setisi Bafan Yisas Karaisin avíkái siretin ákonaé tiamiyá uno. Mai ma Kantá Aunani yorantá avábá in maran iyá tiferuna van mi Tiyarafenu vaípá amúkusintesin téin tiya ino van muno. ³¹Amúkesin ná Tiyarafenu ano séintá daffikantisá Yudiá barafin ma vain kéká ano ma veni vaya átakharé iyaimpin mai ma átaru uádan moní baré orékun ná mumunan kéká ano amusin iyan barano. ³²Mamarantin ma Tiyarafenu ano anunu intí maé túpin timusin bantíi siretin má e váké mumunan ákona uantan maran ótifanté uno. ³³Ará ma kusiantan Tiyarafenu ano siretin masá bano. Mai fura ino.

16

Pori Ma Amusin Baya Vei Arona Kayo Van Tein Baya Ino

¹Teti mumunan tiyofi Fibi maen Sinkriá barurá minó dorarí iyain bákán tiretin onano van orinten mino. ²Orinti mae mai ma Bafani yoran

* 15:27: 1Ko 9:11 * 15:29: Rom 1:11 * 15:30: 2Ko 1:11;
Kor 4:3; 2Te 3:1

banta kama e aya iyaonaí e véin aya ono van muno. Manáa yoran aya ono van ma sinti véin ná aya ono. Mai fara vara seyo, kokhon nanin banta aya uaren ten má deren tiya ukhen mino.

- ³ *Prisira nú Ákuira nú ten má tiyaen Yisas Karaisini yorariín ábasu ifo vá amusin uantano. ⁴Míkan nan mano séin naro siren purin aví döká ída seja ana vékan tusu siantiyá umpo ena anan pinte monó nanin banta ano yeren tusu siantiyan mino.
- ⁵ Mai ma vékan amápin átaru iyain monó kékasá tenti simusin baya siameno.
- Tiamiyáke mai ma Esiá bara finté esé araíen ará baéden Yisas Karaisin ánain ma yakhafein banta mai sesi kama sirona Epenetusi ifo vá tenti simusin baya vá dere véin ná tiameno.
- ⁶ Mai ma saretin aya ono van ákona yorarí iyain nanin Marian dere vá tenti simusin baya siameno.
- ⁷ Inká Antronikusin nú Yuniasin nú mai senti ádéken nan báken ten má karayusí ukharen mifo senti simusin baya vá míkan dere siameno. Téi ma ída Karaisini yoran bantaí ukhékun maen békan manon pefá ayáká dókein bantá kan bákan ena aposeri kéká ano vékan nan peyan doran bantan báken Karaisini kama yorarí ukharen ne siyaren mino.
- ⁸ Bafan avíká ma séi sinunu iyaruna vanta Ampriatusin ná tenti simusin baya siameno.
- ⁹ Tetisi mana yoran banta ma Karaisini yorarí iyain Urubanusí má inká tesí kama sirona

* **16:3:** Apo 18:2

Stakisi nusá tenti simusin baya siameno.

- 10** Mai ma ara ara uman eriyan Karaisin avíká mantaan ákona ukharé ein banta Aperesin má inká Aristoburusini mápin ma vain mumunan kéká dere vasá tenti simusin baya siameno.
- 11** Tenti ádékena vanta Erodionin má inká Narsisusin amápin ma vain mumunan kéká basá tenti simusin baya siameno.
- 12** Mai ma Bafani ákona yorarí in nanin kan Tri finan nú Tirfosa nú bá inká ena sen tirona nanin ma Bafani ákona yorarí iyá ma sinunu ukheruna Pesisi masá tenti simusin baya siameno.
- 13*** Inká mai ma Bafan mano aní ukhá ein banta Rufusin má be anóe masá tenti simusin baya siameno. Rufusin anóe anon te sinóen an dakharen mino.
- 14** Asinkritusin má Frekonin má Ermesin má Patrobasin má Ermasin má inká betin má ma vain mumunan kéká basá tenti simusin baya siameno.
- 15** Firorokusin má Yuriasin má inká Nereusin má be ayofi má inká Orimpasi má betin má ma vain mumunan kéká basá tenti simusin baya siameno.
- 16*** Tiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.*
Minó Karaisini vanasi ma vain mano siretimpin betíi amusin baya yan oren mino.

* **16:13:** Mak 15:21 * **16:16:** 1Ko 16:20; 1Pi 5:14 * **16:16:** Kiriki vaya fintéi Tiyarafenurá ma monó tiyain nanin banta ano ma kantasí ukhein amónan maran iyain nan tikhen mino.

*Monó Tin Kéká Aúban Ma Yaimen Noin Kékasan
Ma Feran Baya Ino*

17* Mumunan tiyofi sifá tiváeyan noe, ma ákona vayan tiamenté uno. Mai ma nóken eraran aúban daimin baya ma sen noin kéka sará dafiseno. Beti ma sin nain baya ano mai mafefá afová ukheona vaya vá ída manaí ukhantin mi savifái aviren orinten mifo ída vá betin ádé orono.

18* Mai fara vara seyo, mai kéká ano setisi Bafan Karaisini avúavá ánaín ída yakhafiyan mifo vetíi ineinerái yakhafiyan mino. Betíi kampun baya kayo fóké banasi ase amiádaren betíi kama munuman máden asuse iyan mino.

19* Máon tiyan mifo sireti ma Bafani vaya ándain dakhafiyaona mai minó nanin banta ano afová ukhen mino. Mai van mi séi simusin iyá umpo sireti ankan puntákein avúavá óde afová ure vá betin má namu avúavá barana vá teno.

20* Máon ma iyasin maen ída ayáká báken mi ará kusin ma amiayain Bafan mano siretin arantan aránaópá Ban Anon kaúden dasaminten mino.

Tetisi Bafan Yisas Karaisini sarisari ano siretin masá bano.

21* Tesi mana yoran banta Timotin má inká tenti ádékena kéka ma Rusiusin má Yesonin má Sosipaterin má ano amusin baya yan tireti vaonafá oren mino.

22 Téi Porini vaya ma uvariyaruna vanta Ter-tiusi anon Bafan avíká tesí simusin baya yékun tireti vaonafá oren mino.

* **16:17:** Mat 7:15; Tai 3:10 * **16:18:** Fir 3:19; 2Pi 2:3 * **16:19:**
Rom 1:8; 1Ko 14:20 * **16:20:** Esé 3:15 * **16:21:** Apo 16:1-2;
19:22; 20:4

23-24 *Monó nanin banta vá ma Kaiusin amápin ma átaru iyákun ma setintá kamaen dafisiyá ein mai véin má deren amusin baya sireti vaonafá dan oren mino.

Mai ma kákán barufin kamanini moníká ma yafisiyain banta Erastusin má inká mumunan tifá tiváe Kuartusin má dere anon amusin baya yan tireti vaonafá oren mino.* **25** *Yisas Karaisi ano ma siren ena anan nanin banta ayain nan ma fefá bompon dókifin tiádan aúpá baré ein mai saréa Tiyarafenu ano siren aya inti mantaan ákona in nono. **26** Mai ma fefá sakhanampa vanta kayo ano siádan baré einiéen mi fara van oriyan ban Tiyarafenu ano ma ákonaen tiádan baré ein mi minó barará nanin bantafin inka sian amá é tiferuna mai kasaen Karaisintá mumunan uren ben ánaín dakhafinten mino. **27** Yisas Karaisini kama avúava sará mai ma afova víkakhein Tiyarafenun aví ena ena yaní ó tifano. Mai fura ino.

* **16:23-24:** Apo 19:22; 1Ko 1:14 * **16:23-24:** Tiyarafenui manáá vompon dókifin ves 24 fin ena vaya asotúin máa sikhen mino. 24 Tetisi Bafan Yisas Karaisini sarisari ano siren masá bano. Pura. * **16:25:** Rom 1:5; Efe 1:9; 3:5, 9; Kor 1:26

YISASINI KAMA VAYA
The New Testament in the Agarabi language of Papua
New Guinea
Nupela Testamen long tokples Agarabi long Niugini

Copyright © 2010 The Bible Society of Papua New Guinea

Language: Agarabi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

PDF generated using Haiola and XeLaTeX on 11 Nov 2022 from source files
dated 22 Nov 2019

105c264e-e2fa-503a-9726-8b662c09b700